

四庫全書

集部

欽定四庫全書

廣成集卷六

後蜀 杜光庭 撰

衆修北帝衙醮詞

伏以五氣玄天北宮大帝司明善惡統御死生壽祿吉凶咸資校錄臣竊恐天文宿曜有臨照之災本命行年有刑妨之咎仰祈真聖持其修禳虔罄丹誠同伸醮禮伏乞解除災厄延益年齡落死籍於北鄴上生名於南

極公私和泰眷屬安寧即仰荷帝君慈祐之恩

三會醮錄詞

臣獲奉正真參受玄錄內期修鍊以保身心外冀威靈  
以禳災沴依科佩受早遂寶持但慮世務所拘塵機所  
役齋戒之日朝謁有虧修行之辰香燈或闕善功未立  
過咎易彰真氣靈官未垂應祐玄司天府譴責不專三  
命五行災衰未蕩旦夕憂懼冰炭在懷今以上會之辰  
天官考校之日功過善惡巨細無遺是敢瀝懇披心虔

誠悔過精修醮禮拜奏章文伏惟衆聖垂慈赦其愆咎  
降流靈應銷解災凶三部吏兵常加祐護動息康泰永  
享利貞即伸荷法錄真官濟護之恩

軍容安宅醮詞

伏以二象既陳三靈配位陰陽陶鑄天地權輿巢居穴  
處之時澆漓未作上棟下宇之制締構云興由是取則  
五行定規六紀順之則福延善著違之則禍起災生考  
其主張寶惟五帝臣所居之處經始有年土木之用繼

新畚鍤之功累作竊恐上千五帝旁犯衆神又今歲興  
修當行年之位近則馮氏忽嬰疾苦懼因犯觸所成輒  
按玄科虔伸醮謝備三天之舊請五帝之靈符乞降正  
神俯流真氣永錫安鎮俾獲乂寧凶邪不侵內外康泰  
疾厄蠲蕩眷屬咸和青宮增福祚之文黑簡息灾蒙之  
數克勤修奉以答神功不任

王虔常侍北斗醮詞

臣以凡微獲逢道化常承覆祐實荷真慈自頃以龍紀

元年奉使支郡方傳上命遽蹈禍機危懼之中真靈俯  
祐獲全形命盡脫憂疑而兩地未通三年隔絕臣男延  
龜懇伸禱祝累告神明天鑒誠深親承應兆仰惟至聖  
介此殊恩思罄丹心克伸報謝今則上元大節啓福良  
期輒脩醮筵上酬明貺伏冀省臨薄禮求納菲誠答往  
願於當年期降恩於此日永當修奉以荷神庥不任

馬尚書南北斗醮詞

伏聞清濁分形高卑定位南北御死生之籍陰陽有舒

慘之殊由是南斗尊神六宮衆聖化功舉善克揚不死  
之文主錄定年唯啓長生之本欲使物皆歸道人盡登  
真副天尊廣濟之慈遵大道好生之禮而塵波易溺意  
馬爭馳罪網牢籠莫有奮飛之路情關固閉曾無開拓  
之門臣跡處人窠心拘俗役機權在握須行懲勸之文  
刑賞是司難徇冲和之用慮其過咎累積陰曹更屬災  
凶便為厄會雖繼伸祈懺上叩於天曹而未吐明誠仰  
陳於南極今則考祥吉日崇設醮筵輒按真科盡披丹

懇元元下土虔露於瑤階昭昭上真必降於瓊席敢期  
哀宥俯念凡微釋罪除愆落北斗之陰簡錫年增祿上  
南斗之陽篇六宮永紀其姓名五緯潛資其福祐乞使  
九玄七祖介福朱陵五族六姻延祥紫府誓勤精奉以  
答鴻慈不任

李綰常侍九曜醮詞

伏聞二氣降和乃形品物三光布象以育羣生惟茲最  
靈仰承明祐至於善惡行藏動息吉凶咸繫上天以司



下土臣幸承前福叨沐道風事主立身得罄忠誠之節  
循懷省已常持兢慎之心祿秩所需神明是貺每增憂  
灼實慮玷危而眼疾所嬰累年為苦針藥雖至服餌益  
勤未獲痊瘳倍增驚懼恐陰陽年運遇此重災宿曜循  
行成其困危曾申禱醮冀獲安寧今又身宮之中暗虛  
所歷當茲久疾值此災期啓向無門彷徨失據伏聞真  
科有格醮酌垂文輒竭丹誠上希神鑒精修醮禮延降  
尊靈伏惟九曜威神分光照納解其宿咎和釋冤尤銷

彼災纏蠲除疾厄使紫童守衛眼宮無痛惱之侵青帝  
護持肝臟有平安之候凶哀永息祿算維新敢忘修勵  
之誠以答照臨之賜不任

馬尚書北帝醮詞

臣獲以凡微早聞道化栖心澹泊注念正真每展祈誠  
必蒙昭祐昨以公田既闢龍麥初齊遲遲之春日載陽  
幕幕之油雲未布眷茲農畝正切憂惶輒叩玄關果垂  
鴻澤爐香散處便呈潤石之容禁水喫時已變如膏之

卷六  
雨遂使西成有望東作無愆可俟京坻以豐川蜀上聖  
之延祥既厚下臣之報德何階虔拂翠壇式陳單菲蘋  
蘩蘊藻誠非仰薦之儀繒燭香花敢備上酌之禮伏惟  
采納永錫嘉祥謝過祈恩不敢繁啓不任

又馬尚書南斗醮詞

伏聞大聖無私隨機赴感至真下濟應念降靈變通不  
間於塵凡救度豈遺於微眇臣自惟幽陋竊慕玄虛洗  
心依冥漠之都潛希懺罪稽首仰鴻蒙之境莫滌前非

上祈拯拔於七玄次乞超昇於三界不任

告修青城山丈人觀醮詞

伏以青城仙山丈人靈觀開九室而數洞覩羣嶽以稱  
尊自軒后錫封漢皇望秩玄宗構宇先帝增崇仙室益  
嚴清壇彌肅近則良宰興葺靈宮鼎新而正寢之西猶  
虛隙地邃牖之北或睹餘基玄元之象設未陳帝子之  
遺跡宛在輒欲興修祖殿經始齋房永資焚謁之儀克  
壯清虛之境將施畚鍤慮犯龍神敢備醮筵虔伸昭告

伏惟允茲丹懇降以玄休使功用必成上下無撓工徒  
安泰福善攸新不任

嚴常侍文人山九曜醮詞

伏聞天地分靈三官定死生之格陰陽懸象九曜垂照  
燭之功南宮開延壽之符北府顯繩違之簡星纏嶽竇  
考校無私凡在人寰咸由統御臣自惟微簿度備科  
儀設微醮以展誠拜靈章而請福伏冀尊鑒領衆聖照  
臨前願已圓殊祥下及臣罪銷厄滅業著功充奉親既

保其安寧薦遠必需其遷拔永堅誠礪以答真靈不任

張尚書丈人山醮詞

伏聞闔闢推移運三元而成歲陰陽變化資大道以宣  
功無遺動植之中普及寰宇之內外施允澤謀猷則文  
武兼資內握推申兵令則賞刑俱用臣竊以張某久持  
重柄獨運赤心上稟聖謀仰遵廟畧或指蹤貔武清蕩  
邊陲或恢復城池削平疆土或誅鋤姦猾摧挫兇豪或  
督誅賦輿經營軍食以茲多事詎可禁刑深虞斬決之

間重輕有失因成譴咎曾未懺祈又恐三命五行或逢  
哀厄明星暗曜或值照臨神道至幽常情靡達非聞至  
聖難滌深瑕是敢依詣山靈修崇大醮遇天地陰陽之  
府周星辰日月之宮瀝懇披心祈恩悔過伏願靈光迺  
鑒除已往之愆違惠澤下臨息將來之災否允垂嘉祐  
永介福祥延壽紀於丹篇落罪名於黑籍以康川境永  
保羣生不任

莫庭乂為川主修周天醮詞

伏聞元聖開光高尊俯化澤周品彙慈覆萬天懸罪福  
之明科標死生之大路上惟邦國下及人臣同歸統御  
之門咸宜沮勸之訓古今不紊纖介無遺臣伏念佐聖  
立功非賢不濟扶危拯難非德靡先節度雖奉玄慈而履  
行之間恐垂陰騭運心之際未合神明既遇災凶復兼  
愆咎遽成厄會莫遂懺祈今年宮中則天符所臨身位  
乃土星對照大運猶居於劫殺飛旗又寄於行年三命  
五行恐逢刑剋列星九曜更慮照臨所以輶軻未寧災



危頻作非憑至聖無路扣祈是敢虔罄丹誠克申大醮  
伏惟衆聖俯降福祥銷災咎於將來釋悔尤於既往六  
曹司命增福算於丹天七紀尊神介休祥於玄極公私  
清泰眷屬安康即永荷衆聖祐護之恩不任

青城令莫庭乂為副使修本命周天醮詞

伏聞道化宣行玄功覆載陰陽不測亭育無私由是五  
帝三皇御六儀而統物天官水府司八會以持綱南宮  
明錄善之科北極總繩非之品吉凶福成繫靈曹竊

惟全蜀與區華陽會府隄封八國柔服諸蕃玉帳既崇  
金臺寶峻外清殊俗於五方內保和寧於四境纔披素款  
遽降鴻慈爰俾神交授其嘉夢魂清氣爽全殊化蝶之  
時捫腹安懷有類得鮫之夕固可表豐歲之兆知災息  
之徵緬維神功申茲景貺兢榮先次感激難勝思答靈  
息重修醮禮星燈吐焰參差玉斗之光龍霧飄香散漫  
瑤池之色全祛萬慮共運一心伏惟丹府上真六宮高  
聖俯廻鶴轡暫降霓旂采納寸誠哀憐末俗拂長生之

金札開大宥之洪休賜其延永之年增以自新之祿王  
務則三農告稔訓戎則七德申威罪咎蠲銷公私昭暢  
存亡介福眷屬延生北元除錄過之書九府錫增年之  
籍况復五緯循行或逢臨照三元繫命時有屯亨遇災  
生福盡之期當減祿奪年之會常情因測揣分懷憂非  
仗道慈無由自濟伏聞太上啓脩禳之典天師著祈醮  
之科謝罪必銷祈恩克降今以本命之日輒循正一之文  
虔拜靈章式陳微醮三宮五緯咸罄誠祈六府七元普


申懺謝伏冀衆聖昭祐大聖鑒臨赦已往之過尤錫將  
來之福慶三災彌息九厄蠲消壽紀潛延祿祚興益公  
私永泰存歿康寧即仰荷大聖之恩不任

畫五嶽諸神醮詞

伏為丈人觀久為荒毀近畢修營土木之役既興粉繪  
之功是設爰於闕殿圖貌靈儀翠雲丹錦之袍玄壁黃  
琮之噐星景日精之品五華七稱之殊二駟六馬之車  
雲翼霞駟之輦儲副二職佐命八山嶽君水帝之儀溪

金史卷六  
卷六  
女河侯之列山林孟長沼沘靈司帝王成秩之曹典巢  
所封之位或傍司海裔東距方諸或別領洞天西鄰崑  
嶠莫不振揚雷電嘯嚙蛟鯨按察幽明掌錄川澤贊太  
上正真之理宣帝王亭育之恩歆彼六氣成乎大化比  
秋冬春夏遵時令以無虧風雨雪霜均歲功而不爽俱  
奉軒轅之命皆待宰執之權嶽瀆衆靈供上司之職則  
希夷真君居天尊之重當臨御之嚴頒序朝宗所宜森  
列今則揮毫匠手彩布循垣燦若星陳矗如雲擁由是

宏裾褒袖玉劍珠旒火佩含星瑤珪歛月或瓊顏倩袖  
若辭姑射之峰異狀竒姿似照潯陽之浦丹青式備絢  
煥如生固當契彼神明藪茲福祉上扶邦國旁祐黎元  
調十雨五風以登稼穡普九州六合以致雍熙洪圖齊  
日月乾坤玄化匝蚺蜃動植虔修醮酌恭罄祝祈佇降  
威靈允孚禎貺謹詞



廣成集卷六

欽定四庫全書

集部

廣成集卷

七至九

詳校官國子監司業臣納麟寶

檢討臣何思鈞覆勘

總校官庶吉士臣何思鈞

校對官中書臣嵇承志

謄錄監生臣熊夢祖



欽定四庫全書

廣成集卷七

後蜀 杜光庭 撰

莫庭又本命醮詞

伏以三官領籍五帝定生南天司祿算之文北斗統紀  
繩之目至於嶽清真府本命宮曹主張而罪福無差考  
校而死生攸繫臣竊慮謬膺撫字有曠輯和刑章或爽  
於重輕教化未臻於德義因成罪咎錄在靈司未申祈

謝之儀恐致災凶之兆又慮天文宿曜或值照臨本命  
行年或逢否塞兼天符五鬼在坤艮之位居本命之神  
况正月對衝尤懼衰危敢因元命之日虔詣靈山修設  
醮筵披露誠款伏惟天曹釋過地簡祛災凶咎潛消福  
善昭集克延箕祿永錫利貞兼乞邑境安寧生靈康泰  
穀稼豐植水旱無侵人無疾癘之傷俗洽和平之美不  
任

莫庭乂本命醮詞

伏聞大道生成元和鼓鑄流形品物布化羣靈申上玄  
寧制之功垂下土吉凶之戒是則懲惡勸善信為格言  
害盈福謙固惟常訓臣夙聞玄旨敢不冥心揣分兢懷  
省躬思道而叨居祿秩未脫囂氛秉朝憲則筆定典刑  
督邦賦則庭施櫛槌功或興於土木膳未罷於炮燔故  
誤之罪莫知輕重之文或爽以茲憂懼恐結愆尤况臣  
今年天符臨本命之辰太白居愁滯之位竊恐志隨灾易  
留連於聲色之間情逐禍移沉湎於杯觴之內因思警

慎仍切懺陳敢於本命之辰虔罄焚脩之禮濯心靈洞  
歸款名山仰斗極星躔冀銷往咎瞻鳳軒龍蓋願降新  
恩使罪戾蠲平冤厄和釋灾凶寧息祿算遐長骨肉則  
兩地樂康生靈則一邑豐泰兵鋒永偃疾癘無侵水旱  
勿興農桑茲阜龍神安鎮遠近昭蘇誓策丹心上副玄  
造不任

晉公南斗醮詞

伏以朱陵闕境南昌上宮御正陽長育之方行大道生

成之化凡所祈啓必賜降臨臣以愚蒙叨逢聖日叅榮  
集慶荷寵雲天常慮庸愚難勝恩遇恐行年厄運宿曜  
灾凶有衝妨刑剋之期滯塞遺述之數惟增惕懼罔敢  
自安輒罄丹誠虔修醮禮特希冥護俯降威光消已往  
之過尤解未萌之災咎續南極丹書之簡更益年齡除  
北都黑籙之文重新祿祚克垂濟度永荷靈恩不任

晉公后土醮詞

伏以惟地惟天厚載廣覆生成庶品孕育羣靈坤德母

儀光被萬有粵自君臣父子洎於動植飛潛厥有誠祈  
合申昭告臣封境之內戈甲屢興害及丘墳戮兼嬰耄  
遠近塗炭人鬼不寧痛彼一方毒深骨髓念茲萬姓誠  
切禱祈瀝血披心仰希鑒祐伏冀虔祝俯借威靈命山  
川嶽瀆之神助平災沴勅雷電風雲之吏共靜郊原大  
開倚劍之門不隔朝天之路昭蘇疲俗洗滌深冤豈伊  
項籍之祠能祛蜀難無使蔣山之廟獨助晉師奉犂陳  
詞言與涕隕不任

晉公北帝醮詞

伏以五緯在天三元運氣上宗北極下統人倫陰陽有  
休否之期躔次有照臨之數伏以慮元命之內宮宿之  
中因遇衝妨遂成厄滯敢憑告日虔備醮筵上叩尊靈  
特希鑒祐使三命九宮之厄盡獲消穰明星暗曜之災  
並蒙寧息一川康泰萬姓輯和解甲偃兵年豐俗阜永  
虔素懇以答玄慈不任

晉公太白狼星醮詞

伏聞垂象上玄各有主宰或統兵軍之會或司氛祲之  
源仰矚光華繫具休戚臣封疆之內戈甲逾年野廩農  
蠶人罹塗炭念茲冤抑痛迫肺肝是敢稽首炷香馳心  
禱福冀因感激俾獲照臨伏希運金方肅殺之威垂大  
義裁成之力助茲武旅清彼郊畿極一川墊溺之憂活  
萬姓倒懸之命弓張伯偃雨順風調百穀有年五兵永  
息不任

晉公壯斗大帝醮詞



伏以斗御中天旁周八極招搖所指邪正聿分今以節  
及正元時當考校群物被能新之澤萬方承煦媪之功  
念此封隅尚躔兵甲生靈塗炭隴畝榛蕪當發生播植  
之初曠黎庶耕桑之業以茲憂痛倍切叩祈伏惟北極  
宮中七元藉內輟衆庶凋傷之目改一方淪喪之災克  
觀和平永銷鋒鏑臣或身逢厄塞罪繫星辰甘寘明科  
以謝群品不任

馬玄通大醮詞

伏聞乾坤覆載陰陽有消息之殊日月照臨寒暑有推  
遷之候吉凶在運否泰相沿雖厯數使然有堯水湯災  
之變而修禳有道見返風退舍之文惟此郊原方當厄  
會烝黎未泰戈甲繼興徵彼星圖實逢大曜是用歸心  
大道虔叩上玄開太乙之壇行三五之法躡紅旄而請  
福步玄斗以祈天所希列火騰威應星芒於上境陽光  
散炤蕩陰穢於下方仰福聖躬大庇川蜀人登福壽  
野息戈鋌同沐神功永銷憂患不任

晉公北帝醮詞

臣聞斗極居尊統臨八表指揮萬象總御衆靈杓建所  
加災凶自息今以封疆之內兵革尚興人未息肩時方  
震懼既勞備禦必廢耕桑念彼榛蕪益深憂難敢憑醮  
酌重罄祈誠伏惟太宰揚威七元振令使雷車電騎掃  
蕩四方畢雨箕風蘇舒品物克清境域大庇生靈如臣  
躔次有災陰陽構厄乞當天譴用息人殃元元丹誠仰  
俟照鑒不任

川主太師北帝醮詞

伏聞垂象表靈位尊北極統臨萬有照燭羣生八十一  
變之威容三十六兵之神武肅清造化臨察幽明殄惡  
誅邪安人護國今以朱陽屆候赤帝司方南風資長育  
之恩四叙叶清和之節蠶功將就農務方繁而疫癘兼  
行鉅鞞未止民多殍仆野困逋逃既投足無場豈息肩  
有所叨居監護寔切憂傷更因衙醮之辰再布誠祈之  
悃伏冀神兵助役蕩氛翳於郊畿雲騎騰威掃疾癘於

閭里生靈有泰遠近無虞昏霧永銷見三蜀山川之色  
浮雲自滅開九天日月之光厄運蠲平災危靜息常傾  
丹素以副玄休不任

晉公壯帝醮詞

伏以六氣周流天道有生成之本七星拘準斗君為統  
制之元罪福吉凶咸歸校錄臣以近畿未泰戈甲猶興  
四野靡安疾疫斯構念茲疲瘵痛逼肺肝敢因衙醮之  
辰更達叩祈之志伏冀曲巡聖力俯借神威垂景貺於

四人息災危於三蜀休兵偃革時泰民安厄運消平福  
祥臻會不任

謝恩壯斗醮詞

臣以凡愚叨依簪褐修持多闕過咎易盈譴責所臨疾  
瘵斯構羸形幾喪微喘偶全三洞法師杜弘廣情切本  
枝念深危疾式披丹懇冥扣玄真果蒙降以殊休續其  
餘筭仰荷真靈之祐再窺日月之光蟬螿力微乾坤恩  
重用伸醮酌仰報生成伏惟聖慈俯賜歆鑒不任

五星醮詞

伏以三光垂耀五緯流輝盈縮有常古今無紊循環  
列次主宰輝生影響靡虧吉凶攸繫臣叨膺命秩獲履  
土疆惠未洽於飛沉境方纏於災沴兵鋒凌暴士庶流  
移千里瘡痍一方殘毒念茲憂痛實切肺肝竊惟上聖  
好生至真育物敢憑慈照再罄醮祈伏希太白揚威助  
武功於原陸歲星舒彩播仁澤於郊圻五辰順軌以呈祥  
萬類承風而納祐野無悲怨俗洽和平誓竭丹襟仰酬

玄貺不任

本命醮北斗詞

伏聞斗正中天杓臨八極魁綱所指福祚必臻臣行運  
之中土居身位遊年之內災向離方今屬斗在南天日  
躔命宿仰申告醮冀獲感通願垂宰制之威以靜晦蒙  
之數克垂玄祐敢負明恩不任

本命醮南斗詞

伏聞南上六宮文昌衆聖壽涯所繫生錄是司動植幽



微咸資主統祈生請福益露明誠臣叨荷寵恩謬司藩  
部功無塵芥過積丘山而行運之中方當否塞宿曜之  
內併有照臨敢因章奏之壇重有禱祈之望伏冀朱宮  
上聖丹闕高尊垂迴凶度厄之慈開出死上生之路使  
一境之兵銷革偃四時之雨順風調拯癘魄於窮泉投  
遊魂於長夜藉元和之澤濟冥漠之鄉浮雲不蔽於青天  
忠懇獲申於白日元元之志仰佇鴻休不任

本命醮三尊詞

伏聞大道照明獨著好生之化天真慈惠聿弘濟物之  
仁亭育必均撫臨無失臣自惟凡陋叨荷寵榮未著勲  
勞存深渥澤而維鵜起誚聚鵠為災蓋薄德所招亦述  
蒙所萃三命之內或有刑衝九曜之中仍聞臨照敢因  
元命虔扣上玄伏希迴此凶衰錫其禎貺赦過尤於既  
往解厄會於將來得傾忠赤之心上答乾坤之澤誓當砥  
礪以奉玄慈不任

周天醮二十八宿詞

伏聞玄象在天萬有成照動植荷無私之德幽明承不  
宰之功臣早被寵光謬司藩翰誠慙薄德繼履深災郡  
邑凋夷生靈淪斃於茲傷痛須勵誠祈伏惟允降玄休  
克寧疲瘵使兵旗永卷無聞冤訴之音稼穡惟豐自治  
和平之化至於山川之內地分災期躋次之中天文厄  
運並希消解俾獲乂康誓竭丹誠仰副鴻澤不任

禮記博士蘇紹元九醮詞

臣以凡微叨逢聖日荷三境照臨之賜承二儀亭毒之

思常慮跡處昏衝身拘俗網脩持有闕罪咎易增雖佩  
奉秘文遵叅寶錄香燈急情葷濁侵凌道氣不降於百  
闕靈官暗遷於六府由是虛邪內集疾恙旁縈夙夜兢  
憂懼不全濟又慮五行三命運遇凶衰兼以土曜木星  
仍臨宮宿顧凡微眇素寡善功當此災期備深惶惕是  
敢按河圖舊典披啓醮壇依靈寶尊文請求天象伏冀  
玄慈俯矚靈貺遐霑洗滌過尤解銷災咎明星暗曜共  
介禎祥八卦九宮並祛刑厄疾患痊復邪癘蠲除增祿

秩於維新續年齡於延永行年神將法錄吏兵輟罪舉  
功咸賜昭祐永當脩勵以答玄恩

川主天羅地網醮詞

伏聞一氣肇昭三靈資始乾竒坤偶定彼陰陽金革土  
浮明其次舍九興於坎戊亥謂之天羅六起於離辰巳  
謂之地網網乃二體昇淪之所羅是兩儀代謝之鄉陽  
伏而不能剛陰絕而不能繼行年所歷實日灾期况天地  
中和圓方化育流形挺質命世降竒皆歸鼓鑄之權難

道興衰之數顧臣凡昧敢避晦蒙丙辰當厄會首臨丁  
巳乃災期將解惟茲二歲實抱百憂上祝玄穹敢希銷  
解伏惟聖鑒俯念誠祈顯降靈威大祛災釁使乾綱坤  
紀息氛泯於一方地網天羅解凶期於小運行歌擊壤  
歸聖朝朴素之風東甲弣弓副玄祖希微之教永勤香  
火以答玄慈不任

川主醮九曜詞

臣叨荷國恩謬分戎閫西南粵壤髻蜀雄都三舍當參

井之躔八國控羌蠻之域區封既廣統制所難常慮非  
才有負殊寄夙夜憂懼不敢違安近歲以來凶災未息  
疾癘時起干戈日尋今按考皇圖驗求玄厯分野之內  
太白將臨况運兵籌方述武旅仰裁成之義伏肅殺之  
威佇靜四郊以康萬姓伏冀天光俯鑒聖力潛資濡渥  
澤於九重救懸威於千里橐弓解甲鑿井耕田里閭無  
瘡痍之家遠近有歡呼之俗長庚所指幽滯俱通即永  
荷昭祐之至不任

楊鼎校書本命醮詞

伏以斗御中天杓移列次乾帝車而獨運浮華蓋以高  
臨吉凶得以司明罪福由其考校雖塵凡香隔仰星晷  
以無階而天聽甚卑有心誠而必鑒丹襟所叩玄應攸  
彰臣頃以災蒙偶逢艱梗道途阻塞骨肉支離因與幼  
男兩地隔睽倉皇相失音信冀通唯晝祝長天夜瞻斗  
極冀其通感再獲團圓炷香而血淚共垂拜手而心魂  
俱往果蒙昭祐遽遂歸還常懷再造之恩未答自天之



澤兢憂度日芒刺在躬今值玉局仙居錦都靈化下藏  
洞府上屬星躔矜饗可期真靈朔會輒投勝境願展醮  
祈將酬福祐之慈少達敬恭之禮佇迓真鑒俯納塵心  
小男以壬子主生微臣以庚申定命常希聖力永賜保  
持祛五行三命之災解宿度天文之厄得勤修勵克奉  
休明黍稷非馨真仙是鑒不任

廣成集卷七

欽定四庫全書

廣成集卷八

後蜀 杜光庭 撰

川主令公南斗醮詞

伏聞天覆地載仰大道以生成稟質孕靈由至真而潛  
運用能彌綸不極生化無窮真宰主張玄功統御雖太  
虛遼邈劫歷遐長庶品喧聞九圍曠蕩刑政繁襟分野  
幽深災福攸同安危是繫臣遭逢聖運塵忝恩榮授以

節旄委之輔相地雄巴蜀境控羌蠻慙無綏撫之能常切兢憂之困况舉善瘳惡須用賞刑伐叛誅兇仍施斧鉞戎祀有牲牲之具賦輿大徵督之勞有土有人蓋不得已實恐詮材不當委任失宜因起怨咨遂成災沴今又土星行度對照此方地一移宮將離益部五鬼臨於坤位火曜躔於井宮又臣大運在衝破之鄉小運當命墓之歲木既薄弱火亦衰微天符臨於行年遊行逢於絕命土方對照又在妻宮金火伏行亦居滯位木星處

愁煩之宿暗曜出乖背之方垂象至明陰陽有數得無  
警懼以自勵修尚恐過咎易深尤違旋積因其愆失災  
及生靈省已耐心不遑寧息竊聞正陽之月丙午之辰  
是六星降鑒之期南斗定生之會滌瑕介福宥罪覃恩  
輒按明科願申昭謝詣玄元真府玉局靈壇精備信儀  
肅虔香火普日月星辰之界遍山川海嶽之司咸罄丹  
心恭脩大醮伏冀迴無私之鑒垂不測之神降彼南宮  
眇茲下土共流真貺俯察微誠解地方之災躔銷天文

之謫見息三命五行之厄除九宮八卦之凶靜土星所  
照之方克承嘉祐禳地一將移之數允錫休禎黎元咸  
保於乂康穀稼必期於豐衍連營有泰四境無虞疫毒  
不侵戈鋒弭戢上願三光表瑞循黃道而福帝躬五緯  
順常扶紫微而拱玄極龍圖永固鳳歷攸昌其有境土  
龍神山川祠廟共延祥祉用拯幽明至於地府陰闕遊  
魂苦爽蛸翹飛走水陸沉潛仰承濟護之恩永享安寧  
之祐不任

川主周南斗醮詞

伏以蜀之星躔上當鶉首蜀之分野下接坤維當申未  
之方在參井之度今以土星對照金火正臨五鬼方寄  
於二宮地一將移於益部恐政乖慈育法喪哀矜野有  
怨嗟人懼災青又行年之內本命之中刑尅衰微慮成  
災厄敢以正陽令月丙午良辰虔備醮祈以申懺滌伏  
冀大開恩宥俯念精修解天文地分之凶祛三命五行  
之咎曲迴禎貺永錫乂安誓傾求理之心以答好生之

澤不任

川主周天地一醮詞

伏以天皇帝司察萬方太乙十神巡遊八極垂災降  
福巨細無遺凡在君臣敢忘炯誠今以地一行位將出  
蜀鄉深虞刑政之間必有愆違之失惟增震惕輒備懺  
祈虔修香火之儀用表依歸之懇伏願鑒其虔切錫以禎  
祥俾境宇安寧生靈蘇泰時和歲稔偃革弣弓克新憫  
祐之恩敢負照臨之賜



周常侍序周天醮詞

伏以道氣運行元和亭育分萬靈而布化垂列宿以麗  
天凡曰含靈咸歸稟受仍俾主宰以定吉凶臣猥以庸  
愚叨承渥澤運籌藩閫慙無制勝之謀剖竹方州實寡  
綏懷之績况地連夷落境控巴賓短才常慮於闕遺雜  
俗尤難於撫諭惟積兢懼保初終既卷隼旗復依戎  
幕顧恩榮而益厚在循省以何安憂畏所深疾恙因作  
每慮積生之始以洎此身三業構非六情結釁前寃未弭

往債所躋或理務之間賞刑不當烹殺之際故誤難明  
或天文宿度之中有逢臨照或三命五行之內有值刑  
衝又今年五鬼在於妻宮天符入於財位小運則丙祿  
值墓大運則水子向衰金支行於身宮網星加於駟馬  
皆為厄會倍切危疑所以疾苦之時冥心禱祝佇其銷  
解用展效酬今則萬聖垂慈衆真憫祐拯其疾厄賜以  
痊平仰玄造以知歸感鴻恩而上答披河圖真格詣玉  
局靈壇備蠲潔之儀設司天大醮星辰日月畢罄誠祈

地府天關遍申昭謝伏願鑒臨丹懇來納素誠永錫吉  
祥克加濟護使罪尤除蕩算紀遐長寬債和平災凶超  
度誓勤修奉以副玄慈不任

王宗璩六甲醮詞

伏以六道凝華元尊布化肇分一氣品列五材終始循  
環生成萬有上惟劫歷資運數以推移下統人倫配吉  
凶而陶鑄稟形毓質咸賴玄功臣早慕清虛志親冲漠  
獲忝秘錄常冀遵修昨以奉使京華經途險遠每虞曠

闕冥有祝祈果蒙道力潛扶殊休密衛達秦甸有安貞  
之吉迺蜀城無敗累之憂仰感靈恩實思昭報今屬重  
陽懿節甲子佳辰虔備菲誠恭申醮禮伏冀神威俯鑒微  
願克酬採納丹襟頌宣洪澤使罪尤蠲蕩寃債和平災  
咎清消福祥臻會事親奉國常蒙憫護之恩守職進身  
永荷真靈之貺不任

孟彥暉西亭子南北斗醮詞

伏聞大道孕靈天尊演化乘機誕瑞命世降賢所以匡

國濟時宣功利物稟星辰之正氣總嶽瀆之英華莫不受命上天凝神中土恢宏器業極祐生靈臣以節度使瑯琊郡王生屬休期累承聖澤以武威扶持唐祚以忠節翼贊睿圖况欲中興克安天下使貢賦常盈於內府明誠首冠於藩維推此勲庸宜承禎祐今以誕生令序禱福佳辰輒備信儀虔脩醮禮依太乙祈真之品詣真人朝斗之壇香散虛庭燈繁靜夜傾心上奏冀獲感通普垂象以冥思遍真靈而醮祝伏願星躔日域地局天

金匱要略卷八  
卷八  
司衆聖迴元萬神昭鑒錫祥符而延巨貺開壽域而懋  
鴻勳永佐聖朝長扶帝座伏願龍神叶贊川境安寧百  
穀滋豐五兵輜戢俗洽和平之美年無災沴之虞動植  
幽明同遵道化不任

勇勝司空宗恪九曜醮詞

伏以大道垂慈萬靈分職陰陽布化星象垂文照燭幽  
明裁成品彙主張有度罪福無差臣獲以塵微仰蒙覆  
燾謬叨寵祿早忝恩榮久統師徒仍分符竹實慮力輕

任重福過災生夙夜兢憂不敢寧處又以今年行運天符入於中宮寄王之方復臨大運况駟馬與五鬼所對小運與大運相衝生月及本命之辰皆遇土星所歷遂成災疾未獲痊平省已循懷復增憂懼竊聞天曹上聖主錄死生北斗南宮司明罪福是敢披心瀝懇拜醮希恩虔詣靈壇精修奏薦雖物微菲而誠願拳勤伏惟萬聖衆尊開恩鑒祐赦臣積生罪咎解臣三命災凶落北斗之死籍上南宮之生錄銷平厄會和釋冤仇疾苦

蠲除祿算延益誓勤修勵以答玄恩不任

衙內宗夔本命醮詞

伏以大道生成陰陽亭育主張有度罪福無遺臣叨荷  
恩榮常增戒懼維側身思過省已捫心每虞操履之間  
難免纖微之失今年三命之內土木氣微行運之中命  
祿皆薄天符臨官祿之位遊年當絕命之方大運則土  
曜所加小運乃元辰所主主都居鈍滯之宿金星入乖  
背之鄉旦夕憂兢恐為災厄是敢按遵科典精潔醮祈



望靈化以馳神仰玄穹而勵懇伏願大司地府九曜南  
宮克鑒丹誠俯垂玄祐賜臣自新之澤赦臣既往之非  
解五行三命之災消列宿暗虛之厄罪瑕清滌冤債和  
平遂推公去已之心傾奉主事親之懇公私昭暢家眷  
康宜普及存亡咸希福利不任

徐新司空九曜醮詞

伏聞天府地司主張命籍南宮北斗統錄死生三官時  
考校之文五帝領裁成之藉顧惟下土實繫上玄况乎

處世立身善功難著乘非蹈過罪目易盈早忝殊榮靡  
申續効或理務有刑章之失或專城有賞罰之差積尤  
違於地府天曹結罪咎於星躔日域曾無悔謝莫遂蠲  
除又自行運之中方當厄會火星飛於小運天符入於  
中宮水曜伏刑厄之鄉土星退愁煩之宿祿火雖王辰  
土尚衰數年以來疾苦未減元元之懇實切憂惶竊惟  
上聖至真垂慈育物冥心注念有感必通輒憑香火之  
緣精展醮祈之禮虔誠悔過稽首希恩伏惟愍鑒庸微

俯弘慈祐解已成之災厄赦既往之罪尤南斗延生北  
宮落死潛增年筭克賜乂安疾瘵痊平眷屬康泰即永  
荷衆聖再生罔極之恩不任

川主太師南斗大醮詞

伏聞大化權興元精剖判生成天地陶鑄陰陽正三統  
以䟽基役四時而成歲由是萬靈受職五氣分鑣天府  
地司領主校籍罪福以之銓叙報應以之弛張毫末無  
遺古今不紊况復上標疆次下制山河隨運歷而慘舒

因暴揚而昭戒仰窺玄訓得不稟修臣夙荷天慈克符  
睿獎峻台衡之位提斧鉞之權玉律金科慮爽重輕之  
信五申三令慙乖訓撫之宜雖盡力匡君傾心許國剪  
長蛇而復宮闕清巨浸而息戈矛再拔城池頻摧塞坐  
變蟻結蜂攢之俗為穆賓向化之人三蜀乂寧四民和  
穆實乃上資聖力明稟靈恩猶恐政理或虧罪瑕難追  
審已或違於道德遊心未契於神明或分野災期或行  
年厄會臣今年小運逢於劫殺大運遇於天符土曜對

於身宮行年衝於命位每懷憂戒思展懺祈竊以丙午  
良辰是南斗降真之日六宮衆聖主藉是司輒申醮酌  
之儀願遂依歸之懇伏冀天闕流貺斗極延慈赦既往  
之尤違錫將來之嘉祿災凶弭息境寓安寧遠近昭蘇  
龍神釋聖風雨均暢疾癘清消以俗泰為嘉祥以年豐  
為上瑞忠以扶於社稷靜以答於神祇虔肅丹誠上副  
玄澤不任

賈璋醮青城大人真君詞

伏以岷蜀雄都西南巨鎮下蟠萬壑上拱九清為造化之殊庭乃神仙之奧府瑤宮瑤闕深秘於洞臺翠壁丹崖仰呀於雲霧高真之所棲息上聖之所晏遊實掌休祥以福寰海臣獲逢道化夙荷玄慈慙無塵芥之功難報乾坤之德而立身處俗易結罪尤往世此生寧無過咎五行三命恐值災衰躔次星文慮為臨照或寃仇所滯或債訟未明有一於茲是用憂懼輒敢披心靈嶠稽首仙都輒備信儀遙申禱祀伏願鑒其丹懇賜以玄恩使

景福潛資壽涯延益凶災消蕩罪咎蠲除寬債和平祿  
祚繁永兼乞子孫嗣續宗緒昌隆誓傾虔奉之心以答  
仙靈之佑不任

蜀州宗夔為太師於丈人山生日醮詞

伏聞道化裁成天元立極申命真宰主張衆靈於是賦  
命稟神流形挺質咸資錄籍以繫上玄臣荷大道生成  
感睿明倚注地分岷楚任極鈞衡功業所彰未禪於造  
化恩榮所錫已冠於古今况屬天步艱難星輿省狩恨

不得手扶宸極身衛帝車克定乾坤重清日月永安大  
寶以致中興虔叩真靈冀扶忠節仰惟青城巨鎮天國  
仙都羣聖依棲列真統制必能振揚神力驅役陰兵除  
災運而靜中原極橫流而匡大業爰遵秘格虔啓醮壇  
願迴不測之威以介無疆之福使妖氛寧息帝祚隆昌  
鳳歷龍圖天長地久臣積生咎釁未兆災蒙因此懺祈  
咸希消解臣今年大小二運俱在酉鄉與命辰對衝又  
火星所照既臨分野仍在身宮土躔厄會之方金伏垂



背之宿年臨三殺之位仍當六害之門恐災咎所加伏  
深憂惕惟憑醮酌以達精虔所祈災數尅平志誠大展  
盡報主酬君之節成權况定難之謀况佐聖明實佇靈  
祐不任

宴設使宗汶九曜醮詞

伏以三象炳靈三元運化稟形毓質仰資大道之仁賦  
命受生率荷神明之德臣獲承玄蔭叨遇休期累忝恩  
榮載塵職祿顧勲勞而未立感寵澤以殊深而慎行謹

身敢忘惕勵運心屬念尚慮曠遺况所至重難務當宰  
膳宴賓搗士須備烹羞撫衆訓戎時行懲賞實恐刑章  
之內或爽重輕庖割之中寧無故誤因成寃債遂積  
罪瑕或往世此生宿愆未解五行三命厄運未祛今年  
則暗曜土星在身宮之上天符五鬼臨行運之方火星  
近刑厄之宮金星躔尅性之位忽成疾苦久未痊除伏  
恐災谷方深叩祈無所竊惟至真濟物大道好生廣開  
禳謝之門俯示感通之力是敢披遵科典虔啓醮壇遍

九曜以披心瞻列星而瀝懇伏冀天光下鑒聖造旁資  
解故傷誤殺之冤赦積世他生之罪消平厄會清蕩災  
凶六氣宣通百疢痊復續將盡之福祿祚增延賜再生  
之恩算命遐益公私昭泰眷屬乂安仰望玄慈不任

遂府相公周天醮詞

伏以虛無大道孕育於羣生天地萬神主張於庶品至  
於誕形稟氣垂象蹤靈咸資鼓鑄之功率賴生成之力  
臣內惟涼德夙荷道慈勲勞未贊於聖朝寵遇已隆於

藩翰隼旗龍節疊奉殊榮相印兵符頻叨睿獎顧茲虛  
薄實切憂兢每慮賞罰不明刑章不當舉措有乖於理  
體綏和未洽於物情興脩有土木之煩宴犒有烹燔之  
費故傷誤殺往債宿冤兼此罪尤成其譴責或五行三  
命暗曜列星共結災躔遂為疾厄尚未痊復倍用驚危  
臣今年大運居衰氣之鄉小運在馬破之位木星退身  
宮之上土星照六合之方金水二星臨乖背之宿飛天  
火曜居本命之辰九宮土星復當生月觀此災運用切

禱祈是敢按靈寶玄科河圖秘格設周天大醮懺謝上  
玄伏冀萬聖感通衆神昭鑒納其壽年五星叨景之中  
永消危厄天府地司之內別注休禎所疾蠲平克賜安  
豫益堅忠孝上奉君親仰荷衆尊祐護之恩不任

親隨為大王脩九曜醮詞

臣聞垂象炳靈代天行化發揮道用昭著神功粵自剖  
判之初即顯司明之力生靈動植咸賴玄恩臣獲稟天  
慈深叨帝澤功業未酬於覆載寵榮已冠於人臣常慮

綏撫乖宜賞刑有失金科玉律或爽於哀矜伐叛誅凶  
或輕於鈇鑕前代之冤仇未解此生之過咎潛彰以此  
省循常懷震惕又臣今年大小二運俱值對衝首尾蝕  
神皆為臨照支干大木在衰氣之中天符飛行居駟馬  
之上併為災滯尤切憂惶近則微恙所嬰尚未痊復希  
恩謝過倍切禱祈輒於本命之辰虔誠奏醮伏惟至聖俯  
鑒丹襟赦已往之罪瑕解將來之厄會增延算祿和釋  
寃疑得以罄竭微衷扶將大寶撫安疲俗匡讚中興誓

傾脩勵之心永答真靈之貺不任

廣成集卷八



欽定四庫全書

廣成集卷九

後蜀 杜光庭 撰

青城鄭真尚書本命醮詞

伏以稟氣分靈全資天道挺生毓質仰繫上玄壽祈延  
永之期占叶始終之吉五行倚伏二氣推移實憑宰制  
之功敢怠敬恭之懇臣今年火曜居本命之方九宮金  
星在行年之上久纏疾苦未獲痊平竊慮履行運心有

虧陰騰字人慈物有曠政經或積生釁咎未除或往世  
冤仇未解構茲重厄無路輒祈况境控仙山地當洞府  
明誠可告真鑒難誣敢因本命之辰虔備醮祈之禮洗心  
謝過瀝懇希生伏惟少駐鸞驂下臨塵壤愍其歎迫假  
以恩休輟死籍於黑書再延命祿定生名於丹錄盡赦  
深瑕冤債和平災凶消解公私昭泰眷屬安寧敢忘策  
勵之心上副真靈之祐不任

果州宋壽司空因齋修醮詞

伏聞三光麗天下司羣品死生是繫罪福攸同臣以塵  
微仰蒙鑒祐而三命之內水火力微值辰承魁綱為天  
羅地網二運逢墓併屬災期又星火到元首之宮暗曜  
在命宮之位災數重疊憂懼殊深是敢遵按明科虔申  
醮奏仰崇齋福精備醮祈三日恭嚴九時闕奏伏冀玄  
慈俯燭洪澤濡臨賜臣災運消平凶衰超度克延祚祿  
允介福祥永保又寧常加護祐奉親事主報國寧家誓  
罄丹誠上酬玄澤不任

楊神湍謝土醮詞

伏以道氣分光玄功宰制下鎮靈化上配列星萬聖之所宴遊羣仙之所棲息肇於歷劫以逮茲辰玉女上賓認香泉於江滸玄元駐駕留玉局於城隅耀天目之祥華以安井絡啟洞宮之徑隧以福坤維為錦都靈勝之墟乃蜀國神仙之府而膳營久曠蕪蒼幾侵清壇為蹂踐之場閔殿染膾腥之襍我蜀王迴開神鑒矚此玄闕遽命澄清俾其嚴飭拂烟煤於石壁重挹仙儀雜蒿蓀

於荒階再窺靈洞邇後累加締葺漸獲精新堂宇相望  
樓臺櫺比復遷門閤俯及康衢夕磬晨鐘得以備朝修  
之禮朝香暮火得以申蠲潔之儀報德何階感恩有自  
輒陳醮祝冀達真靈伏惟廣灑神休大頒嘉貺增聖主  
遐長之算寧謚萬方貞蜀王椿桂之年又安三蜀連營  
將校各崇竹帛之勲比屋生靈共樂和平之化龍神悅  
豫稼穡豐穰疵癘無侵鋒鋌永戢其有薰腥穢瀆穿鑿  
侵傷承此懺祈咸蒙消解臣等佐時濟俗行教立功奏

御上通遵脩咸契公私亨泰眷屬利貞然願往法化流  
先師德普冥闕無滯道果速圓內外職寮陰陽將吏遷  
功加品永贊福庭克弘至道之風常荷尊靈之澤不任

忠州謁禹廟醮詞

伏以三氣肇昭九元裁質清浮濁厚真精鑠造化之鑪  
出震乘乾大易啓乾坤之韞堯天繼覆舜日傳明五教  
允敷未革懷襄之數四門是闢尚纏昏墊之憂惟我睿  
明拯茲下土驅馳四載勤瘁萬方浩浩無虞百谷識朝

宗之路巖巖可仰羣山知維嶽之尊區別九州撫寧庶  
彙鑄鼎之功既集錫班之報攸彰懋此宏勲光於終古  
臣夙承洪澤獲奉仙祠巫雨巴雲捧臨瑤殿岷江楚澤  
滌蕩瓊階願迴疏曠之慈俯鑒虔誠之懇探經玉洞展醮  
靈岑副蜀王遐視之誠遂微臣歸依之願不任

泮州謁二真人廟醮詞

伏以真精表瑞元氣分形積靈秀於人寰凝為仙嶽寄清  
幽於物外嚴設洞天上屬星辰下福邦國由是瓊宮珠

闕秘邃難窺羽蓋蜺幢飄颻特降二真人三都跡顯九  
鼎功成白晝登真丹霄控景威靈益振物象長新寶冊  
真經琅函玉篆貯靈宮而作鎮與嘉躅而常存遐想玄  
風迅馳素懇今以三川觀化累遇干戈鳳扎龍書靡存  
於魯壁虎符龜籙難訪於秦坑大教凌夷所宜弘拯是  
用翹勤翠巘稽首白雲申醮酌之儀冀神仙之鑒輟鷗洞  
緘藏之本為人天宗奉之經佇奏殊功却還舊所竊惟  
道無不在法許流通仰望鴻休允諧丹款亦願潛迴禎



既普及寰瀛玄元之祚衍繁昌聖主之宮城匡復九圍  
寧謐萬彙昭融臣境寓乂安生靈康泰災纏自息算祿  
增延永持忠赤之心上副至真之祐不任

自到仙都山醮詞

伏以元化既分茲山作鎮前臨楚望旁控巴城衆流迴  
環嚴設龍蛇之府羣峰擁衛秀為真聖之都二真騰翥  
於前朝千載昭彰於懿躅岩巒際日松檜叅雲禎祥時  
耀乎簡編福祚潛資乎邦國蜀王扶天茂績命世雄姿

八國二江早列封圻之內黔城楚碛皆歸陶冶之中惟  
此仙山光於境寓仰靈蹤而稽首遙展誠祈望闕境以  
馳心虔脩醮酌將以求書禹穴佇逢八會之篇探簡洞  
庭願值五符之訣敷弘典則演暢真宗况屬大教凌遲  
中原多難俾其紹習須俟流通某躬泛長波式遵成命  
焚香昭告願鑒丹誠所期汜水橋邊不獨傳於漢相曲  
陽泉上豈止授於干君捧帙西歸中興聖教不任

李延福為蜀王脩羅天醮詞

伏以道冠虛無功先覆載陶甄有物亭育無私綿劫歷  
以長存後天地而悠久裁成不竭生化彌彰臣夙荷玄  
休克承遺運功輕塵露任重台衡數千里之山河周旋  
六鎮十七年之臨撫宰制一方每虞福過為災力微成  
釁兢榮循省憂懼難勝况復大駕未還中原多壘訓兵  
勵士徒懷於報國勤王望闕馳心其柰於天高日遠微  
勲靡効孤懇何申今復大遊四神方在雍秦之野小遊  
天一仍臨梁蜀之鄉地一次於坤宮月孛行於井宿仰

茲緯候緬彼災蒙深慮鳳輦鸞輶百二之闕河未復陵  
園寢廟九重之城闕猶虛惟切禱祈佇迴鑒祐是用按  
依玄格遵鍊明科修黃籙道場設羅天大醮九清三界  
咸陳懺謝之儀天真地靈備展奏祈之禮普日月星辰  
之域遍山川嶽瀆之司畢罄齊莊用期通感伏冀天尊  
降命聖祖貽休俯借神功載康國步鴻圖克固鼎祚中  
興齊北極以常寧比南山而共永臣允承天澤長奉唐  
年享椿松延廣之齡竭金石忠貞之節境無災沴歲洽

豐穰雨澤不愆干戈不作龍神安鎮士庶又寧幽局霑  
開度之慈絕域慕和平之化誓弘清淨之心以答真靈  
之貺不任

羅天中級三皇醮詞

伏以玄蓋上浮黃輿下鎮元精降瑞應運開圖握六紀  
以召臨恩周率土體三才而司牧惠洽羣生塞寰區而  
聲教攸傳亘今古而光靈不泯臣謬膺天澤作鎮坤維  
荷覆幬以難勝誓忠貞而有守屬乾綱未舉天數中微

瞻雲而河洛方遥捧日而山川尚阻徒傾丹赤莫展勤  
勞今又大遊四神在雍秦之分小遊天一次梁蜀之鄉  
地一鎮於坤隅月孛行於井宿考遵緯候伏切憂虞是  
用披按明科脩崇黃籙備羅天大醮祈三界真靈願假神  
休共迴天數使忠貞義烈振風雷掃蕩之威文武尊神  
借戡定經綸之力重昌祚厯永息妖氛九圍睹清晏之  
期三蜀荷安寧之賜災祛未兆福降無窮動植存亡同  
臻恩祐不任

羅天醮太一詞

臣伏按歷緯今年大遊四神在雍秦之分小遊天一次  
梁蜀之方地一屆於坤宮月孛臨於井宿仰披天度緬  
屬災期省已拊心伏增憂惕是敢按遵玄格崇啓壇場  
脩黃籙寶齋備羅天大醮輒披玄蘊敷露真文伏冀尊  
神迴景上玄貽休下土旁垂禎貺永息災躔賜臣封境  
乂安龍神輯睦生靈康泰遠近昭蘇疢癘無侵干戈弭  
戢唯虔脩奉上副神功不任

羅天醮嶽瀆詞

伏以二象昇淪剛柔定位三靈恢廓川嶽裁形坤儀彰  
厚載之功品物荷資生之德雖混淪莫極猶虞九六之  
期廣博無疆以繫芘亨之數今以運陰陽所毓歷統緯  
所甄天一小遊既移於梁蜀四神太一亦次於雍秦地  
一屆於坤宮月宇行於井宿仰惟天度伏用震惶竊以  
臣叨荷寵恩久司藩屏封圻六鎮襟帶重江水惟四  
瀆之尊山居五嶽之長仙壇靈化皆駉虬馭鶴之蹤珠



岸金堤乃禹導秦通之野真靈攸處祥應實繁必介休  
符以副虔祝是敢齋陳黃籙醮啓羅天冀衆聖之垂慈  
會萬靈而降福共安天步永奉聖圖蕩昏暄於神京重  
瞻聖日混車書於海宇克保唐年臣境土安寧生靈舒  
泰邊無烽燧俗洽謳謌息未兆之災躔解已往之愆咎  
誓虔砥礪以答神功不任

羅天普告詞

伏聞玄功宰制道化宣行稟象流形凝神運氣天覆地

載爰起於渺茫日照月臨肇分於萬有至於陰陽昇降  
劫厯推移乾坤有九六之期烏兔有盈虧之數將期拯  
護久仗真靈臣以微躬遭逢昌運叨承異渥踐歷殊榮  
龍節虎符攝封壤山河之重金科玉律掌生靈性命之  
權常慙撫育非才每以滿盈為戒而屬中原多難天步  
方艱社稷綴旒寰瀛塗炭訓齊武旅徒懸報國之誠迨  
遞神都莫得扶天之路今者稽求厯緯考察經圖大遊  
四神方在雍秦之野小遊天一傍臨梁蜀之鄉地一屆

於坤宮月宇躔於井宿緬惟天度彌切憂兢是敢披靈  
寶簡文按河圖品格設羅天大醮開黃籙寶壇仰金闕  
玉京虔祈萬聖遍寰中象外普告衆靈馳意馬以披心  
託香龍而薦懇冀蒙鑒祐允降威神伏惟三界諸天四  
司五帝乾元主宰地府尊靈降陰陽不測之神假變化  
無窮之力神兵密助真應潛彰大業中興萬方安泰皇  
圖永固四海澄清掃彗孛於長空勦鯨鯢於巨浪常瞻  
聖日共戴堯天賜臣境域安寧災凶弭息五兵韜戢四

氣均調黎元無瘥疫之虞稼穡有豐登之望三州六鎮  
士庶龍神克洽歡康同臻貞吉其有幽魂滯識六趣三  
塗沐玄澤以生神詣朱陵而受福存亡開度動植蘇舒  
誓傾忠孝之誠仰副神明之鑒不任

羅天醮衆神詞

伏以人為神主神依人以變通神福於人人資神而讚  
祐承天統地有國有家惟古及今率由斯道我大唐臯  
陶種德聖祖垂休光宅中原傳二十帝玄風扇於萬寓

皇澤浸於九圍徧彼羣倫咸蒙覆燾而運鍾艱否時屬  
播遷天數未寧帝車未復忠臣義士皆懸報國之心望  
日瞻天敢怠勤王之志今以小遊天一纏梁蜀之鄉大  
遊四神在雍秦之野月亭行於井宿地一次於坤宮緯  
候所明兢憂是切是敢按遵玄格披考靈科修黃籙寶  
齋設羅天大醮下窮九壘上極三清嚴陳懺請之儀願  
假感通之應伏惟尊神衆聖憫鑒丹誠雷發神威風回  
景貺掃攬搶於碧落殄氣翳於皇都永固鴻圖中興大

業次願封疆分野消解災蒙祛厄會之期致和平之氣  
龍神輯睦風雨均調疵疫無侵戈鋌永戢誓勤握政上  
副神功稷黍馨香必虔於蠲潔蘋蘩蕙藻克展於齊莊  
瀝懇陳情不任

蜀王本命醮葛仙化詞

伏以圖穹列耀上表於龍星方局裁形下分於仙化實  
司命籍以統人倫臣獲稟玄機夙臻景祐早承寵渥收  
此烝黎縮六鎮於封疆德慙涼薄控諸化之靈勝誠切

欣榮常虞政理之乖莫副真仙之鑒今屬太一行運分野慮災或臨梁益之方或在雍秦之境月孛纏於井宿地一災於坤隅稽考緯書伏增憂懼况歲當丁卯是臣元命之年月屆仲春是臣稟生之節詣本命之化以本命之辰虔備香燈精申禱祝伏冀元尊憫矚衆聖鑒臨騰素款於上宮錫鴻休於下土帝圖興復息災期而輦蹕還秦境寓康寧銷否運而禎祥介蜀俾罄報君之節允符憂國之心百穀豐登羣生和泰龍神昭貺疵疫無侵

臣七祖生天年齡增永誓弘道化以啓靈恩不任

莫令南斗醮詞

伏以玄道聿分化機肇啟清濁定昇淪之位陰陽運刑  
德之樞南斗主生垂吉昌而勸善北宮紀死編罪惡以  
繩非神明用之以化人帝主用之以致理纖微不失今  
古攸同臣宿稟真暮仰宗玄訓敢忘勗勵以自秉脩而  
叨備宮榮屬茲多事雖加勤恪實有懼於曠違徒切兢  
憂固取譏於尸素誅奸癖惡或舉刑章督過懲愆或施



鞭楚犒士或開其宰戮宴賓難廢於烹燔恐因故殺誤  
傷遂結深冤厚釁又臣行年所歷小運逢災宿曜所纏  
火星為照月臨申未天符居本命之辰位對丑寅飛旗  
當衝破之地慮成厄會彌切震驚雖省已循懷寬刑慎  
行減饌節酒遠色防非猶慮凶咎未蠲福祥莫應恭披  
典冊虔詣靈山按南斗文儀法上玄分緯九微燈影宵光  
遠擬於六星一德香烟雲色高連於三素竹殿既招其  
虛實松軒可降於真靈向北披心敢期符祐伏願大宮

上聖輟死籙以延生五緯尊神碎禍車而流福冤尤消  
解災厄和平骨肉安寧境邑康泰風調雨順穀稼豐登  
寇盜不興沴瘴無作所請靈寶玉篆赤帝天書伏願解  
臨照於南丹錫恩慈於下土永承貞吉以遂禱祈不任

鄭頊別駕本命醮詞

伏聞玄天垂象斗極居尊統萬彙以無私御四時而成  
歲下司命籍總制吉凶有感必通有祈皆應臣粵自童  
丕竊仰威靈以七星為天地之樞五氣為裁成之本主


張禍福制錄鬼神傾心每奉於上玄有醮必存於北斗  
疊蒙昭祐累降禎祥動若影隨事猶響答至或願捐所  
職謝病尋醫或懼履禍機違凶就吉或雪志於侵誣之  
際或滌瑕於猜忿之中潛瀝懇於長天暗馳誠於永夜  
至真在鑒有願咸從而多事所縈靈息未報常期精潔  
冀啓醮筵今者天徇深衷神諧夙望幸叨攝任獲在仙  
鄉玉闕瓊都咫尺封隅之內凝嵐積翠高低城邑之旁  
况屬命辰仍當秋景遂得躬披松檜身躡雲霞展三獻

之禮容猶申公務酬積年之祈禱兼遂私心省分循懷  
既榮且朴是敢捧持詞款營備香燈雖澗瀆行潦之微  
難迴聖鑒在隨機感赴之德願納愚誠所期答已往之  
恩佇將來之澤賜其禎吉介以康寧俾縣境無虞農功  
有歲人和俗阜遠睦邇安臣或本命五行災衝所及天  
文九曜臨照所經或正理有所未明賞罰有所未當新  
寃往債故殺誤傷並乞蕩除永承恩祐不任

孫途司馬本命醮詞

伏以二氣肇分五行運化鼓陰陽之橐籥執生死之樞  
機亭毒無私陶鎔靡倦司短長於五帝校善惡於三官  
維斗居尊總御羣品臣自懼幽陋仰荷裁成獲備冠裳  
每憂叨竊遵素儒之明訓守玄聖之格言尚慮動息成  
非行藏乖道難階福善易結過尤仍恐三途推移或逢  
厄數九曜纏次或在危宮况今年天符臨勾絞之方小運  
當伏吟之位十三宿內月亭所經大運今年猶居衝破  
以茲憂懼恐履災凶敢因本命之辰虔申醮謝伏惟真

聖俯鑒誠祈赦已往罪尤和寃釋結錫將來福祉增祿延年眷屬安寧公私和泰即永荷衆尊慈祐之恩不任



廣成集卷九

欽定四庫全書

集部  
廣成集卷  
十二

詳校官國子監司業臣納麟寶

檢討臣何思鈞覆勘

總校官庶吉士臣何思鈞

校對官中書臣嵇承志

謄錄監生臣熊夢祖

欽定四庫全書

廣成集卷十

後蜀 杜光庭 撰

李仇中丞本命醮詞

伏以三象陶融三元生化裁成品物亭育羣方受命稟  
形上繫天府至於壽筭遐促祿祚短長立身有罪福之  
因行運有吉凶之數天司地簡主宰無私臣伏恐三命  
五行或逢災咎九星七曜或值照臨陰陽有刑尅之期



祿算有凶衰之會又恐積生所犯冤債未除積世所行  
過尤旋結常情罔測神道難知非託醮祈無由解謝輒  
因本命之日虔備香燈仰玄象以披心對星壇而瀝懇  
敢希至聖俯鑒丹誠三官落罪簡之文五帝削災妨之  
籍臣宿瑕蕩滌積釁消平輟死北宮上生南極天曹增  
祿司命延年眷屬和寧公私清泰即荷衆聖之恩不任  
張道衡常侍還願醮詞

伏聞垂象九天流光萬有帝車周運聖力遐通裁四海

以無私福羣生而不宰惟祈必應有願克從臣頃以大  
順二年遭逢危厄憂踰蹈火危甚履水既難保於朝昏  
敢望全於形命元元丹懇啓愬無門惟注念蒼穹冥祈  
玄斗潛興大願冀贖深災果蒙大道鑒臨至真通感垂  
好生之澤開固極之恩獲洗罪尤盡消寃戾仰天慈而  
積感報玄造以無階旋屬公役所拘道途無暇歲華累  
改誠願未申况復水陸經過江山往復幾逢倣擾頻值  
艱危幸脫鋒鉦免羅凶橫皆承廕護倍切兢榮今以本

命之辰於玉局靈化詣北斗七元之殿當玄卿大帝之前虔備醮壇恭酬往願昔所許奏錢若干貫請至今年八月五度奏納取畢伏惟斗中衆聖玄府上司鑒領丹誠曲迴鴻造使宿願周備靈澤遐霑赦過除災延祥介福年祿增益危厄消平眷屬又寧公私貞吉即永荷斗極衆尊覆祐之恩不任

周庠員外郎為母轉經設醮詞

伏聞三洞寶經九天真訣虛無凝炁混合成文龍篆鳳

章發跡杳冥之始瓊編玉檢敷宣天地之先大則制御  
乾坤保鎮劫運安寧祚歷昭祐帝王次則和輯五行調  
平六氣蠲邪度厄濟物利人遵脩則災咎可銷諷誦則  
禎祥可降臣等以母行年衰厄疾苦所嬰憂懼但深告  
祈無所敢憑玄聖披瀝丹心伏願勅三寶威神命侍經  
寮屬解五行刑尅却三命凶衰增祿南天延生司契六  
府調理百疾痊平永承覆祐之恩克享遐長之福謹於  
玉局化轉經設醮冥扣至真不任

莫庭乂為張副使本命甲子醮詞

臣聞天道無親輔茲有德功或及物福必無涯當川安  
撫副使張琳奉主無私酬知盡節初終一制雖風雨而  
不渝籌畫萬端越歲寒而彌勁頃以四郊多壘兩鎮稱  
兵物力將虛經費逾廣厚歛則生靈必困薄賦則供億  
不充出自良謀豐其軍食糗糧山積戈甲雲屯人不告  
勞物無失所益振貔貅之勢佇成弔伐之功但以張某  
三命之中猶逢災厄二運之內甲祿氣微天符臨受命

之宮土星逆愁煩之位慮為災咎輒罄誠祈爰託皇壇  
旁敷玄祐伏願十華降福三聖迴光錫善祝於諸天災  
殃自息蕩過尤於九府祿筭增延永俾安寧共康藩屏  
臣情誠迫切冒瀆高明不任

駱將軍醮詞

伏以二氣清凝表天地亨貞之道五材倚伏荷乾坤成  
育之恩至於命籍短長祿祚豐薄立身罪福行運吉凶  
莫不上自天司旁資元命主張考校巨細無遺臣竊慮

列宿五行纏次有照臨之咎九宮三命陰陽有厄會之  
期以此憂兢恐成災厄今以立冬節令祈福良辰虔罄  
丹誠精陳醮禮仰天闕而瀝懇瞻地府以真心佇降恩  
慈曲流洪福使災凶殄息過咎蠲消錫以嘉祥增其壽  
福落罪書於北府紀生籍於南康眷屬安寧幽明康乂  
徊翔大路長親日月之光棲息人寰永沐真靈之祐不  
任

馬尚書醮詞

伏聞歷象推移運三元而成歲陰陽變化資大道以宣  
功澤霈幽明事均今古其有弘仁秉義體順和光則天  
錫禎符神彰吉貺或動乖守慎志協回邪乃蹈彼艱虞  
兆茲否塞影響之報理實昭然臣猥以庸愚早塵職祿  
雖肅恭自立畏慎推誠常懷聚鷁之譏每懼維鵜之誚  
况復訓齊戎伍祇奉藩垣鋒鏑猶施鉦鐸未息推堅挫  
銳徒申擒討之謀故殺誤傷慮構幽寬之咎以茲屬念  
深用寘懷今則秋帝考功地官校籍罪福咸舉毫末無



遺或臣有塵忝之非有殺傷之過有六情之罪有三業  
之辜有注訟未除有冤仇未釋事顯黑薄名挂陰曹乞  
乘悔謝之緣並降蠲消之澤俾其克勵得以自新至於  
宿曜垂災行年值厄亦希超度獲保又安上祈九祖生  
天三塗離苦飛沈遂性生植無傷四方之戈甲早寧萬  
戶之農蠶畢就俗聞謠詠野息氛埃咸歸清淨之風大  
洽希夷之道虔修醮酌懇薦章詞遥祝仙壇仰望真祐  
不任

馬尚書本命醮詞

臣以庸微叨承宿運謬參職族繼忝官榮統御戎車襲  
行條令或尅收境邑除蕩奸宄外禦寇仇內綏疲瘵而  
宴賓犒士須有宰傷去弊誅邪必資刑律誠非狗已務  
切安人竊慮斬決之間重輕有失傷殺之際故誤難明  
以此憂惶恐貽譴責又慮臣行年三命或值凶衰宿曜  
五星或逢臨照因其厄會遂履凶危又恐九祖幽儀未  
蒙遷拔六親滯識猶有拘留緬長夜以魂驚念陰闕而

心懼思罄歸依之懇聊申薦奉之誠輒憑本命之辰式  
備資薰之力冥心靈化遐想寶壇陳醮禮以肅恭貢章  
詞而精禱伏冀玄元錫祐大道流慈光開泉曲之庭詔  
下鄴都之府使九玄超度衆苦蠲銷生神碧落之天蛻  
影朱陵之洞福延後嗣惠被宗親其有往世愆瑕無窮  
寃對咸承懺滌並使和平乞臣罪簡落書生宮注籍災  
凶弭息祿算遐長兼祈福介川源澤覃遠近戈鋌早戢  
疵癘不生野復耕桑人歸富壽洎乎沈潛異質溟漠殊

庭同沐玄風咸昇道域誓虔丹懇永奉鴻慈不任

司徒青城山醮詞

伏以灝氣漸凝羣山挺秀高扶宸極厚鎮坤輿惟彼西南上通參井結靈積瑞含藏日月之華疊翠堆嵐包括神仙之宅位崇衆嶽秩亞三山為天下之福庭冠域中之勝際崇臺比立黃軒之秘跡猶存巨浸旁分大禹之神功可覩每彰符應以祐生靈頃屬雨澤踰旬泉源空涌丹崖翠嶽雖傳湖泮之聲紺殿彤軒靡有震驚之變

金史卷之八十一  
卷十  
緬茲羣異益驗光靈臣叨荷殊恩膺茲重寄綏撫之能  
未著兢憂之懇常深恐臣過咎所招仙嶽降異常之兆  
災蒙所襲神峰垂警告之祥夙夜省循若據冰炭莫展  
披陳之路惟虔禱謝之誠輒按明科恭申大醮庶蒙  
鑒祐以贖愆違不任

馬尚書本命醮詞

伏聞元化運行三才資始體乾坤而成象感陶鑄以凝  
神由是懸命籍於天闕繫死生於斗極其有行藏巨細

舉措洪纖八靈照察以無遺干真考譬而畢至善功潛  
著則名列仙曹過目所彰則書編鬼錄用茲懲勸以導  
於人其惟本命尊神主張校錄緬思玄旨實切稟修臣  
猥以凡微曾無機略惟奉公克已效命為時未展勞能  
累驚塵忝揣循增懼委任益深况封畿戈甲之餘壠畝  
榛蕪之後疲羸未復瘡痍未平撫之則濡沫纔通撓之  
則溝渎甫及而驟司六邑務彼三農暑耨寒耕雖勤劬  
於人力有秋望歲殊即俟於天時但罄丹心顯祈玄祐

敢因本命之日虔申醮謝之儀所期真聖鑒臨福祥臻  
萃赦臣叨據之過獎臣肅奉之誠使鋒鏑所經京坻有積人  
無疵癘之苦年祛水旱之虞俾臣九祖超昇三塗清晏  
其或宿曜運行之厄歲年刑尅之災淫刑濫賞之非故  
殺誤傷之咎並希昭祐普錫蠲消永誓歸依以酬真贖  
不任

莫庭乂青城本命醮詞

伏以稟氣分形上資玄化制算定祿仰繫真曹臣伏恐

履行之間或貽愆咎年運之內或遇災凶非仗神功難  
申醮滌輒干真鑒虔備醮儀傾以此山嶽瀆上司神仙  
福地洞中之玉樓金闕塵俗難窺人間之古殿荒臺蹤  
基易變梁摧蟪蛄瓦落鴛鴦若無營葺之興已雜蒿萊  
之徑某叨居宰宇竊備繕修既俾功庸仍申藻績圖五  
嶽九江之象貌河侯溪女之真肅穆冕旒駢羅珠翠如  
登貝闕似挹驪宮既揮煥於素垣益深嚴於玄德所冀  
少城天府永賴休禎秋報春祈克承嘉祐敢因本命之



日度脩讚祝之筵伏惟應念迴軒分靈降澤錫臣以增  
延祿算助臣以消解災凶兩地之骨肉安寧一境之生  
靈舒泰誓傾丹悃上副鴻慈不任

莫庭乂青城甲申本命周天醮詞

伏聞妙本應期元精啓運三光分照萬有陶形圓清方  
濁之間遞為主宰日域星纏之內各備職察大則司劫  
歷施張小則察人倫善惡有逾衡鏡無隱鋒毫竊惟九  
室洞天羣真會府丹崖蕩日翠谷呀雲鸞旂之所往還

霓節之所遊集叨膺宰字獲詣仙山雖食蘗苦心飲水  
潔已功應無補過必彰聞况於咫尺之中敢罔真仙之  
鑒更慮九辰行命三命推移福善不常災凶靡測拳拳  
素懇若履顛危輒因本命之辰載申祈醮之禮天衝地  
壤水府星宮咸罄血誠仰祈明祐伏乞解災釋過延貺  
垂祥壽祿惟增凶危自息已往則九玄開度見存則兩  
地安寧一境生民同承福祐兵車休駕封部無虞長欣  
靜謐之期永荷靈真之澤不任

莫庭乂九曜醮詞

伏以二象分華三光列曜司悔吝吉凶之契操死生福  
罪之權主宰無遺幽明咸繫臣自惟凡昧夙奉正真叨  
荷寵章獲忝位祿循涯省分常懼於曠官恤物安人敢  
忘於勵已尚慮動違恭慎日積愆瑕上瀆真靈潛貽厄  
會又恐五星進退四曜運行或居身命之宮或臨惡弱  
之位况臣今年天符臨於命卦木星永出身宮第二十  
宿中蝕食所歷小運行直又值天羅竊憂福過災生命

衰祿薄按河圖內品大玄秘文瀝懇貢詞披心備禮仰  
華蓋儀璘之闕若對九芒瞻星辰日月之宮盡傾丹款  
伏冀宸光下燭開昏晦而洗沈冥靈景延暉碎禍車而  
焚罪網使年齡克保品秩攸昇一境之士庶康寧兩地  
之親緣安泰仙山表貺人無瘡痍之傷靈府垂禎歲有  
京抵之望唯虔素悃上答玄功不任

川主相公北帝醮詞

伏以七政上尊五靈玄老位司北極部制中天至於地

分吉凶天文災福五行六氣三命九宮萬彙慘舒咸歸  
考校臣以兵戈既久殘瘁逾年念彼生靈痛深肌骨敢  
因醮謁載罄祝祈瀝懇紫微扣心玄象實希憫鑒俯降  
禎祥消沴氣於郊原退災星於井絡一川康泰萬有昭  
蘓永戢戈矛惟新歷算九天霧捲重披日月之光三蜀烟  
清再播雲雷之澤即仰荷帝君憫護之恩不任

川主相公周天后土諸神醮詞

伏以天府名區少城輿壤龍神福地天帝雄藩豈以凡

微叨茲臨鎮而謬分朝寄總此封疆十載於茲日深兢  
懼但以粵初莅任便屬艱難黃中犯秦翠輿幸蜀行朝  
萬衆駐驂五年力盡扶天誠深報國功宣匡復以及迴  
鑿其間有師立稱兵盱能竊發秀昇擁師於下瀨郭琪  
奮臂於中軍咫尺乘輿震驚輦轂上資睿武旁假神威  
相繼克平以安大駕感茲靈祐常佇血誠今則時未底  
寧人方肆亂帝車順動又幸陳倉中原有焚燎之災六  
合靡晏寧之所雖誠深憂國志切匡君難申稭紹之衷

山川杳隔空隕袁安之淚扈衛無由緬想神功必垂濟  
祚爰申醮禮仰冀靈通希迴助順之恩共安天步少借  
害盈之力遠掃凶渠復黃屋於上京延寶圖於萬葉椒  
漿之奠永啓明慈臣不任瀝懇披心虔請之至

葛仙山化醮詞

惟彼仙山鎮茲神壤八十一洞分日月於地中二十四  
峰縹烟霞於天際潛司罪福以統生靈臣夙慕玄微  
早崇清淨躬逢聖日既叨輔贊之榮夢想靈山常貯道

遥之志尚繁多事徒鬱素懷今節及仲秋禮當望秩遐  
瞻翠巘杳隔紅塵虔備醮壇用申誠祝伏冀虎旗龍旆  
達辭八極之宮鶴馭鴻駮聊降二仙之駕歆茲薄禮錫  
以殊休俾稼穡有年凶災不起幽明共福家國咸安比  
寶祚於崇岡續唐年於劫厯必期脩潔以奉靈光不任

川主九星醮詞

臣聞九元御極綜列宿於紫微七政垂光統衆星於黃  
道指攝提而臨萬象運招搖而主百靈生死吉凶咸繫



司牧臣以受年之時此月火星及時曜罡星皆臨本命以茲戰悚恐蹈災危敢以丹誠上祈玄祐虔脩大醮備瀝微忱伏惟九聖延慈乘帝車而降福七真垂貺迎杓建以祛災二十八宿行藏皆資祥慶一十二宮分度永息屯蒙誓勤忠赤之心以答靈真之念不任

中和周天醮詞

臣以庸虛猥當大任極台衡之秩居藩屏之崇雖傾捧日之心莫著匡君之績頃以四郊多壘中國不寧戎馬

載馳兵車尚駕或近臣肆逆或遠鎮辜恩纔滅梟巢初  
迴鑿輅又聞薄伐再致省巡凡在人臣豈勝憤惋惟注  
香冥想望聖祖之貽休拜表祈真待陰兵之助役果見  
偽王孽相連頸殲夷凶帥狂夫繼蹤斬馘緬惟幽讚更  
切明誠近又太乙運行已照蜀分五星移度或在身宮  
慮薄德所招即凶災薦至常加惕勵罔敢違寧遂有鄭  
君雄韓球地結連遽興兵甲隔絕恩信凌犯闕防殘掠  
生靈焚燒郡邑數州塗炭千里傷夷憫此幽寃痛深骨

髓臣所以上祈至道明禱真靈志先憂國憂人誠匪為家  
為已由是上天悔禍大道降靈包藏者尋就誅鋤黨附  
者皆從剪撲封疆既靜凋瘵旋蘇韓球敗亡君雄梟戮  
漸通道路將雪冤沈尚以芟刈之時殺傷非一仰體好  
生之旨震悼何安俯嗟遊岱之魂淒涼莫已是用凝神  
扣寂拜手歸心陳謝恩謝過之儀瀝祝地祝天之懇庶  
祈玄聖曲鑒丹誠輝映清壇降流洪澤蠲除愆咎弭息  
災凶使生者又寧幽途開泰臣又聞衆星拱極百谷朝

宗蠹彼不庭敢違天道更隣近境綿亘數州山寨相望久  
為兇逆欲恃其蜂合蟻聚之勢伏鋤耰田挺之徒垂二  
十年不寘睿化擬因建瓴之便將申破竹之功為國誅  
奸與人除害重希神力克震軍聲鄴都以三十萬兵常  
祛沴氣洞泉有二十五將潛制妖徒正道殛邪神明助  
順敢緣斯旨再罄赤心伏惟俯鑒奏陳克迺明祐使昌  
瀘梓遂永無蛇豕之災草木藂林盡化鋒鋌之狀咸知  
帝力上復王謠然後疇賞龜城拜章鳳闕弣弓解甲歸

馬放牛長謝魚水之歡克暢君臣之道明明血懇大道鑒  
之不任歸命祈恩屏營憤切之至謹詞

廣成集卷十

欽定四庫全書

廣成集卷十一

後蜀 杜光庭 撰

程德柔醮水府脩堰詞

伏聞大道垂功裁成品物真靈設位主宰羣生至於水  
府明神山林正職各司罪福以庇蒸黎當縣地控上游  
素名劇邑賦輿重大耕稼滋繁堤堰所防安危是繫其  
所脩偃分當彼濬流自汎溢以來累有摧壞雖俾夜作

晝竭力殫心旋有葺完尋聞傾陷豈水脉所注不可備  
防豈龍神所為未容障塞憂惶迫切無所告祈且食乃  
民天人為邦本或虧秋稔必致年凶况天府膏腴勢連  
下瀨少城戶口旁接通波若為侵軼之災必有泥沙之  
變救茲墊溺須仗玄威伏惟大道開恩明神流鑒愍其  
農畝念彼生靈迴不測之神功借無私之聖力特垂濟護  
安全使黍稷永豐京抵有望又襄陵懷山之禍叶年豐  
裕富之期蘋藻効誠敢負靈貺不任

川主醮五符石文詞

三寶開光五文孕化凝水火木金之氣成雲霞龍鳳之  
書保制乾坤鎮寧天地洎乎降傳下土濟護羣生夏  
禹得之以成功仲尼奉之而興詠有家有國罔不遵修  
所以伏御神祇鎮安川嶽禳除氛沴清肅宮城至於居  
宅之興亦在鎮禳之例臣頃於所部特創新居既畢巨  
功爰申大醮按河圖品格依靈寶文儀篆刻真符清修  
香火所冀解消犯觸安集正神召彼靈官永垂擁衛伏



惟玄元鑒祐衆聖流慈勅勒職司錫其禎祝居止寧泰  
眷屬安康分近天皇大火之鄉况屬身宮或隣對照捫  
心震惕循已驚虞是用瞻本命福山仰列仙靈化歷主  
元而禱祝遍九曜以虔祈伏冀洞府神真披香奉御玄  
天尊聖垂澤降臨賜臣以景貺禎符解臣以災期厄會  
克承祐護允洽康寧上願皇業天齊聖圖嶽鎮伊川洛  
汭運叶中興八水三山俗諧昭泰戢鋒鋌於九野共文  
軌於萬方臣得勵忠貞永扶英睿不任

蜀王為日虧身宮於玉局化醮詞

伏聞大道縱靈元和肇化燭三光而上列運六氣於中  
天播裁成字育之功物無不遂持寒暑暄涼之柄政無  
不均所以五星東大帝之符司明罪福十神行太乙之  
令統御吉凶律歷難欺古今所稟臣遭逢聖運塵忝殊  
榮山河控井絡之雄封壤握坤維之重常虞福過實懼  
災纏今則涼德靡脩太穹垂戒月朔則太陽薄蝕當臨  
照之方既望則太陰變虧在身宮之位飛天火曜臨於

命辰干祿納音仍逢衰氣恐成災咎彌切憂惶是用遵  
按玄科勵精丹懇奉香蓋於玉局陳醮禮於瑤壇仰三  
景以希恩普周天而禱福伏冀昭彰俯鑒肸螭垂休賜  
禎貺於三命五行解災期於身宮分野至有故傷誤殺  
往債宿寃咸賜蠲除永俾貞吉上願皇圖攸久聖壽延  
長還金符大漢之隆宅洛契宗周之盛干戈偃戢夷夏  
昭蘇得傾報國之心克叶自天之祐不任激切虔祈之  
至謹詞

安宅醮詞

伏聞道氣流布三才乃分陰陽陳變化之機水木肇相生之象巢穴之風既替宅宇之作遂興順二氣以營修體五行而制度實資神化大庇生靈臣以庸愚不明玄理因時改作隨力興修土木之功曾無避忌穿鑿之處深有驚喧或抵犯主方或背違尺道致使龍神未守居止非宜恐迫凶衰更延災厄謹歸心大道稽首三尊按靈寶明科修五帝大醮虔恭懺謝拜請符文懺已往犯

觸之非祈將來安寧之福伏冀二儀介瑞五帝垂祥凶  
惡蠲除龍神鎮守人口清泰動靜康寧營運興生常蒙  
利祐公私和暢眷屬乂安即永荷太上衆尊五帝祐護  
之恩不任

八節醮詞

伏以大道垂化元氣流形鼓鑄羣生有清濁剛柔之異  
舒張八節定春秋冬夏之方所以考校吉凶司明罪福  
惠既周於家國恩亦普於存亡臣等獲值昌期早欽道

化資神功而生育荷聖力以裁成竊慮處俗立身寧無  
過咎前生今世必有愆瑕或五行三命之中遭逢厄會  
或暗曜明星之下因值照臨以此兢兢憂輒思祈醮爰逢  
令節同謁丹誠是天元啓候之期當大聖延慈之日翹  
心靈化稽首瑤壇精潔香花虔恭醮祝伏冀高尊鑒祐  
衆聖哀憐垂罔極之慈賜無疆之澤使積生罪惱累世  
冤仇已往之愆非將來之厄運乘八節自新之力降三宮  
肆赦之恩並賜蕩除永錫貞吉使臣等九玄七祖受福

祉於南宮眷屬親緣落死名於北府公私和洽壽祿遐  
長卽永荷衆聖祐獲之恩不任

都監將軍周天醮詞

伏聞大道混融羣材昭著陰陽昇降吉凶之理肇分善  
惡循環罪福之文是啓玉虛大帝金闕元皇申命真靈  
俾其主宰三官五帝爰居勸沮之司南斗北元以統死  
生之錄洪纖備舉億劫無差所以丹簡玄經有脩禳之  
秘訣祈天悔過有懺滌之明科竊仰弘慈敢陳微願臣

獲膺宿會運偶昌期猥以凡庸遭逢異寵伏念載清履  
濁寓世立身事主奉親自家刑國雖忠貞勵節勤瘁在  
公而休祉難臻愆違易集况臣頃因扈衛時屬艱憂豺  
豕欺天霧霾蔽日層巖瑞氣但希護於帝車九陌妖塵  
正昏蒙於輦道乃忠義奮身之際是人臣效命之期得  
以手捧天樞身排鯨浪克寧皇極以罄丹心遂叨非次之  
恩遽荷重難之寄連營魏武千里隄封慙無監撫之能  
但切兢憂之懇竊恐臣前生今代歷劫以來未達正真



動成罪孽或上虧天理下犯地宜中忤人情旁違物性  
十纏外積三業內興或助順除奸誅邪佐命或故傷誤  
殺秉法持綱或星曜運行時逢臨照或三命經歷因值  
衰危八卦九宮有刑妨之數冤仇債訟有考對之文幽晦  
常情眇然難測唯資修奉上叩玄虛冀獲感通克承覆  
祐是用按河圖真絡披正一靈秤溥海嶽以貢誠遍乾  
坤而瀝懇恭陳醮禮以展肅虔伏惟三寶迴光衆真流  
鑒赦其夙過錫以殊休罪簡消除生名列品和平冤債

清蕩災凶九玄七祖同霑洪澤六姻九族咸沐玄慈俾  
川境安寧生靈輯睦俗無疵癘野有謳誦幽府冥司神  
輝朗徹飛行蠢類惠渥滋濡上願國步夷平聖躬和暢  
五兵弢偃萬寓乂康鑿旂早復於秦京象法重懸於魏闕  
瞻天望日言發心馳不任

衆修本命醮詞

伏聞大道垂光三靈資始人天設位萬化互分稟氣有  
清濁之殊賦運有吉凶之異昏明既判罪福亦彰於是

太上弘慈元尊愍護南土闕延生之府壯都陳銓善之  
科兩曜列星布無私而照燭三官五帝開大宥以君臨  
畫欲使其洽無為俱臻清淨品登仙果名列真階臣等  
叨沐神功幸逢昌運聞玄儒之妙旨履道義之康衢坐挹  
堯樽行誦睿德揣躬省已榮抃伏深但慮往劫此生立  
身舉錯動成違戾率忤幽明六情之愛染難祛三業之  
愆非易積文昌簡上未紀善名鄮部宮中已標罪目又  
恐行年災咎宿曜加臨或土木興工犯干集忌或故傷

誤殺結聚冤尤遂使暗奪年齡潛消福祿非憑勝會難  
寫深誠今屬白露凝晨清秋屆節是懺罪祈真之日乃延  
恩致福之期輒率同誠歸依至道齊持法信稽首靈壇  
遍天府以披心望星宮而注想伏冀三元上聖十界衆  
尊南極威神北臺寮輔念其虔懇降以光靈流福祐於  
存亡息災凶於永遠使臣等九玄七祖咸得生天五族  
六親並蒙安泰罪瑕除蕩祿壽延長門宇清寧運求諧  
遂五行三命永無刑剋之災私室公庭長荷利貞之福

不任

張道衡還北斗願詞

伏以玄象垂光物無不照帝車周運感無不通臣以幽  
微仰蒙鑒祐頃以大順二年身陷危厄性命是虞輒瀝  
丹心上祈玄造遂發誠願奉錢十萬貫文旋獲安寧克  
蒙清雪螻蟻之生已保真靈之澤未酬尋以奔迫道途  
辛勤南北難逢良會莫振宿思水炭在懷寢食增懼今  
則歸心靈化稽首瑤壇虔備香燈精修醮酌自今年四

月至今月五度奏錢滿十萬貫文兼於玉局化北帝殿  
塑造北斗真君八身功德用申奏懇上答玄恩伏惟聖  
慈曲賜昭納使誓圓昔日願遂茲辰宿罪蠲除消災蕩滌  
冤仇和解平祿增延公私叶貞吉之期眷屬享乂寧之  
福存亡咸泰品彙沾恩不任

行軍僕射醮宅詞

伏聞大道融真天尊演教赤明御運靈寶開圖八會成  
文凝結太空之表五符流跡昭宣大有之中五帝受之

以度人九天得之以定位降於下土護國濟人摧伏凶  
妖誅滅邪惡凡所興造皆許遵行臣頃以營繕所居土  
木將畢恐有干犯難備考詳竊按玄科請行符命脩崇  
黃籙開奏清都刻五方大帝之文依三洞鎮禳之格下  
告五土上奏九微伏願衆聖垂慈萬靈孚祐勅命符吏  
頒示職司降以威靈布其真氣蕩除魔怪安靜龍神八  
卦九宮五行六甲陰陽刑殺太歲將軍各鎮方隅永祛  
災咎其有伏尸故氣金土邪精滯真遊魂幽靈暗魄各

乘善力俱遂逍遙克保安寧永臻福祐不任

衆補修三會醮詞

伏聞人之稟生資於二氣陰陽定體魂魄守身稍或愆  
和即成災否三會之日是三魂攢奏之辰罪福吉凶纖  
毫無失增壽奪算賞罰甚明所宜積善除非立功補過  
用祈吉應以保遐齡玄聖格言真經明訓敢遵守以戒  
身心臣等數年以來於下會之日共申祈醮以罄焚修  
昨者迫以塵緣偶遇佳節中心憂惕不敢遑安今則別



選良辰旁招善友同營香火特展醮祈靜夜寒更真心  
注念真靈必降誠願冀通伏惟萬聖迴光千真鑒映錫  
其禱祝除彼災凶制魄招魂各遂修生之望迴凶變吉  
咸開遐永之程臣等或三命衰微九宮厄滯或星文臨  
照災運縈纏或宿債未平餘殃未息或故傷誤殺積過  
深瑕俱乞蕩除克賜昭祐合家蒙福九祖生天公私有  
通泰之祥眷屬荷乂安之澤不任

皇帝設南斗醮詞

伏以三光麗天照臨萬有衆星垂象統御羣形南斗文昌實掌生錄為正陽照物之本乃帝皇壽命之司按天元上清等經若五月五日值丙午之辰則啓福延恩濟生利物和寧品類安鎮邦家陽德所資普享其福今年以火水金土四星聚於實沈之墟又逢日度所經皆為順伏五月合朔太陽當蝕而不蝕洎乎既望太陰當虧而不虧斯乃五日得丙午之辰純陽所應顧惟寡昧歛荷玄功慙化理之未周念聲教之未普敢期流貺以及

微躬所願大道延慈工天錫祐俾九州四海俗泰民康  
年豐而六氣均調候正而四時和暢弢弓偃革歸馬放  
牛咸臻保命之祥克廣好生之德冥心丹禁稽首玄壇  
瞻八景以低臨冀九光之遐燭鑿茲醮酌介以休祥辰  
輝炳靈幽讚之功已著人天交感協和之期可佇混一  
車書大同寰宇式虔祈荷上副玄慈不任

皇帝周天醮詞

臣聞風雨霜雪之不時則星辰示象嶺蘩蘊藻之可薦

乃天地垂休緬是前修實為通義臣恭臨大寶虔奉丕  
圖不敢違寧若臨水谷而頻移圭律七變槐檀慮兆庶  
未康恐一物失所或刑政乖謬或恩信未孚干戈猶駐  
於疆場正朔未同於夷夏水旱不節富庶莫臻昏墊札瘥  
繼聞於郡縣盜賊欺誑尚恣於鄉閭雖則務畜勸分貶  
食省用不邇聲色永絕畋遊瓦器蚌盤敢忘於刻已雖  
頭虎魄豈事於娛情猶慮上曹重書厥罪顛蒙有愧首  
謝無由近則金火二星水土兩曜併聚蜀分皆次實沈

日月有薄蝕之期朔望却史臣之筆太陽順伏分野垂  
休豈此禎祥併歸冲渺益勵退修之志彌彰戒懼之心敢  
因干日之嘉辰聊荅上玄之厚貺靈宮渺邈紫府深嚴雖  
昭告之備申慮誠明之莫達齋潔選日懇悃陳詞寂寂  
玄壇儼威儀於乙夜飄飄仙馭降福祐於人寰伏冀八  
表乂安黎民清泰邦家鞏固社稷永寧六府孔脩九功  
攸叙簪裾奉職書軌同文不任

醮瀘州安樂山詞

伏以楚蜀連封西南重地江馳萬派嵐積千峰天帝以  
之會昌龍神以之固護惟茲輿壤獨擅雄名三層燭烟月  
之光八洞閔靈仙之宅常弘勝利以祐蒸人年無旱潦  
之傷俗保安貞之吉致沂泐之攸濟俾絲枲之蕃豐銜  
三觀威靈荷二真慈貺傳諸近遠載彼經圖翹首注心  
共誦玄澤臣名拘輦轂望切林泉每憐素豹玄猿常戲  
芝巖桂岫延頸企踵跡滯神遊輒贊微香遙陳孤懇臣  
以所居北帝院齊醮所給鍾簾未周雖申降福之儀幾

闕飛霜之韻始聞仙山之內法器且多既無考擊之期  
虛蔽鏘洋之美道隨誠感鐘固可移願減有餘資其不  
足較於翠嶽遷就皇都清聲漸遠於彤雲洪響佇聞於  
紫禁願俞誠祝永鎮京華不任

廣成集卷十一

欽定四庫全書

廣成集卷十二

後蜀 杜光庭 撰

醮名山靈化詞

伏以大道融精是分二象元尊布化以播萬靈咸稟運  
於裁成共輯寧於邦國欽哉羣望實總休禎伏惟應天  
順人開基創業雖未致昇平之理而幸成庶富之鄉四  
國爰來百羣咸在人心允若天意昭然而或教失義方



情牽慈愛付染盛之大任委監撫之重權庶人元膺益  
恐胸襟都忘孝敬用奸邪之扇惑興背叛之兇狂矢石  
欲及於乘輿金鼓近喧於侍從猶賴上天垂祐靈化督  
祚不容梟獍之心坐矜豺狼之黨未更昏旭悉已蕩除  
中外再寧寰海稱林爰擇良日仰報威靈遠申昭告之  
誠輒罄潢污之薦敢期鑒祐永叶安貞不任

鎮江侍中宗黯解纜醮水府詞

伏以道化遐覃神休普被上惟邦國下及人倫咸資拯

護之功潛假保持之力古今無異水陸攸寧臣猥以常  
材叨逢聖運經綸締構慙無竹帛之勞渥澤超昇累荷  
乾坤之造遽蒙睿獎顯授洪符登韓信之齊壇授呂侯之  
金鉞錫茅分閭推轂專征省循徒切於兢榮倚注靡容  
於陳讓選辰棟日邁命啓行况楚峽上游錦江下瀨舳  
艫則千里拯駕泝泐則萬派爭奔實用真靈總斯陰隲  
皇帝宸襟所屬每切敬恭思布化以睦隣亦申謀而懷  
遠雄師銳旅首在此行將解纜以順流爰潔誠而致醮

伏惟玄元大聖五老高尊命靈將玄司助洪休巨福迅  
浪昏期於利涉驚湍盡變於安流萬里通津百神加祐  
克昌大業更廣鴻基外屏中朝共臻禎福不任

周庠員外瑱本命醮詞

伏聞天鑒孔明有感斯應神道正直無祈不通每垂拯  
護之仁以副禱祈之願祛災流貺猶響應聲竊佩斯言  
常虔片志每因元命得備焚修式勵深誠實荷明祐但  
慮塵機未息過咎易盈宦路所拘悔尤難追因星辰照

臨值年運衰厄但懼衰纏敢思福會自從軍都隣部寓  
跡外封一駐戎軒兩周天序既闕奏陳之禮必招逋慢  
之愆本俟凱還併申醮謝今則方當劇壘未議橐弓久  
曠香燈不遑寧處是用馳心靈觀遐邇至真備三醮之物  
儀同一壇之闕告伏惟玄聖俯鑒丹誠解厄消災延生  
保命宿瑕蕩滌往咎蠲平克覩成功永臻多福不任

大王本命醮葛仙化詞

伏以二氣資靈五行稟象法圓穹而定命體厚地以流

形罪福吉凶皆由陰騭運心履行咸繫主張况荷殊榮  
久叨重寄循涯省分常切兢慙每因章醮之壇敢忘敬  
恭之禮冀憑修奉上答君親今屬元君之辰詣本命靈  
化精誠香火祈扣真仙願鑒丹襟俯頌鴻福俾臣罪瑕  
除滌壽祿增延疆寓大安生靈康泰災毒無侵於四境  
農桑克美於有年得傾葵藿之誠永奉昇平之運不任  
歸命虔誠之至

大王初修葛仙化告真詞

伏以九隴名區三仙化跡上通心宿下鎮錦川雲霞疊  
綺繡之光松桂竦烟嵐之色五宮高闕狀西靈南極之  
儀四輔交輝列東華北真之象最標形勝獨占幽竒斜  
界玉輪旁臨石礪而屬師徒傲擾鉦鼓震驚火彗橫空  
霜戈照野熊經鳥申之士抗步不還瀨流枕石之人拂  
衣長往眷茲勝異一變榛蕪崇樓之金碧塵銷廣坐之  
儀容薜剝緬惟殘毀深可歎嗟况其本命之辰配於茲  
化宜申締造用容真靈乃命三洞道士唐洞卿伐木鳩

王揆星選日得風箕直事當甲子良辰虔告至真恭修  
大醮伏冀鑒其誠懇錫以休祥災沴無侵功庸速就續  
昔賢之遺構成曠劫之良規播美洞天勒銘雲谷然願  
真靈誕祐川境謐寧稼穡滋豐災氛殄息受靈丹於九  
輔聞至理於重玄常傾拱極之心仰副上真之貺不任  
懇切之至

親隨司空為大王醮葛仙化詞

伏以上清仙山葛真靈化為川中之勝境乃天下之福

庭呀玉洞以藏雲聳瓊巒而蔽日彩霞朝散神燭夜飛  
乳滴幽巖泉鳴深竇九井之光靈自顯三真之舂螿常  
存拱鶴觀於中方應龍星於上境紅軒紺宇舊制相望  
蕭殿韋碑古跡鱗次每彰休瑞以及寢瀛臣以本使蜀  
王元命之辰配屬茲化頃申締葺遽獲周圓飛閣層樓  
奪晨輝於峭壁風窻雲棟增異境於崇林再啟洞天用  
安錦府四十州之封域歲稔京坻五十里之山河俗臻  
富庶人皆受福孰不知恩臣曲荷陶鎔實深造化唯虔



金匱要略卷之二十一  
卷十二  
禱祝少答恩慈輒備醮筵上祈道力伏惟九天孚祐衆  
聖鑒臨下燭丹誠廣垂洪澤三川境廓八國塵清稼穡  
蕃登災氛蕩滌神傳靈藥克享於遐年功讚聖朝永隆  
於大寶再安社稷常福寰區臣某等不任禱福希恩虔  
誠歸命之至謹詞

再處儔還北斗願詞

伏以垂象上玄照臨下土帝車運載杓的指揮罪福吉  
凶咸歸主宰臣等頃以銜命遠涉道途踐歷艱危登臨

險阻每持丹懇潛祝玄真果蒙鑒祐之恩克獲安寧之  
貺仰承靈澤志切上酬敢因某日之辰虔備修焚之禮  
炷香答願拜荷玄恩仰冀高真特紬微款祛災蕩厄增  
祿延齡來往坦夷公私貞吉路岐無滯眷屬咸安常親  
日月之光克奉休明之主不任

紫霞洞修造畢告謝醮詞

伏以大道希夷神仙變化示無方之妙用垂不測之玄  
功幽讚帝王潛扶邦國惟今及古史冊煥然所以唐堯

姑射之遊軒后具茨之謁穆王之登瑤水漢王之幸峴  
山皆披盼烟霞瞻窺冰雪是用享年遐永致理和平克  
振宏休允彰道祐顧惟涼德啟創丕圖金闕玉京敢息  
敬恭之禮九清三境每懷寅奉之誠粵以永平二年壬  
申七月二十一日下邳漢州什邡縣獲太上老君錫命  
識文留玉篆於仙居刻銅符於厚地生辰命屬時日姓  
名叙變世之蟬聯明卜祚之延久四年八月二十四日  
戊子利州團練使王承賣奏此山靈洞顯見神仙遂命

威儀任可言高品楊和淑專申告謝仰答光靈十月一日  
甲子纔啓醮筵再聞應見雲旌羽旆叅差崖壁之中鶴  
態神儀羅列洞門之內事邁於昆山瑤水美超於姑射  
具茨祇荷禎祥彌增震惕是用考諸典禮特舉封崇以  
是月甲申改道長山為玄都山陽謨洞為紫霞洞景谷  
縣為金仙縣封玄都上神為玉清公創厥壇場鼎新觀  
宇自初揆構逮於畢功累見真儀益彰靈貺謹遣金紫  
光祿大夫左諫議大夫廣成先生蔡國公杜光庭等一

十二人賫信幣香花按玄科具典於紫霞仙觀脩金籙  
道場况屬下元允當大節式陳昭謝再顯旌封伏惟洞  
府衆聖高真仙官寮宰鑒茲丹懇錫以玄休使九土乂  
寧萬方平一天官地府常垂愷悌之恩卜世享齡克叶  
延洪之福稽首謹詞

洋州宗夔令公本命醮詞

伏聞誕質流形咸資大道稟生賦命必繫上玄荷乾坤  
覆載之慈均氣運陶甄之力惟精修勵寅奉真靈伏念

臣獲以微塵累叨皇澤入叅輔衛出領藩維曾無涓露  
之功常切滿盈之懼今則厯象之內身宮之中暗懼正  
臨火星對照慮成厄會無所告祈竊惟大上垂文元皇  
設教正一著修禳之品河圖有陳醮之科苟罄精勤必  
蒙昭祐敢因本命之日爰申九曜醮祈蠲潔丹心歸依  
玄極伏惟衆真大聖俯鑒明誠蕩滌罪瑕解除冤債消  
平災厄延續年齡增祿祚於南宮落凶衰於北府洗心  
克已上酬真聖之恩奉國推忠永答君親之德臣不任

又本命日醮詞

臣聞天地之德以生為先生成之恩以福為本臣叨承  
福會獲奉昌期蒙三光照燭之慈荷聖主儀隆之澤便  
藩寵遇履歷顯榮每虞於福過災生惟切於持盈約已  
彌增惕懼豈敢違安今則命躔之中身宮之位火星對照  
暗曜正臨仰垂象以真心何階告謝顧微生而勵志但  
切憂兢是敢於本命之辰備河圖醮禮虔披丹悃冀  
降玄慈伏乞賜臣災咎消平凶衰沴息壽年增益祿祚

豐延特傾嚴奉之誠永答至真之祐

越國夫人為都統宗侃令公還願謝恩醮詞

伏聞至道玄通隨機赴感冥丹心於下土動玄鑒於上  
清響答無私影從靡隔妾夫主宗侃男肇等去年以統  
戎伐叛勤王俯迫孤城遽淹旬月烽烟警急音問寂寥  
瞻褒汚以魂馳望山川而目斷憂危徒切祈叩無門遂  
虔詣道宮乞申章奏嚴陳法席降請天兵盼饗感通真  
靈保祐俄開堅壁大破凶狂成掃蕩之功副聖明之獎



骨肉團聚師旅凱還尅平實自於睿謀護助亦兼於道  
力輒因良日昭答玄休重申章醮之儀式罄謝陳之禮  
精心備信拜手焚香仰真駕於三十六宮祈大儀於八  
十一好庶祥輝烟爚低臨壇墀之前巨貺滂洋永錫邦  
家之吉聖圖遐永舉族蕃昌誓勤嚴奉之誠克副靈真  
之照不任荷聖謝恩虔切之至

司封毛絢員外解災醮詞

伏聞道氣宣行玄功鼓鑄三靈資稟乾坤司覆載之權

五緯操張寒暑柄推遷之運由是挺生賦命咸繫天關  
福善禍淫畢由神化是宜恪勵以奉靈休粵自幼冲即  
逢聖日便藩異獎寵沐殊恩北省南宮極榮於踐歷衣  
朱曳紫已極於輝華常推報國之誠每切律身之戒尚  
慮陰陽睽隔或值凶衰厄曜運行或為臨照興功動土  
有忤於龍神履行立身或虧於畏慎未申祈懺倍用兢  
憂今則立運臨於命辰天符飛於艮地大運在戎仍值  
魁罡土星方伏於身宮所照對衝於丑位懼成災咎彌

用驚危伏聞南府文昌主生銓善北宮斗極舉過懲非  
吉凶無爽於錙銖報應有同於境象真教開懺陳之格  
惟感必通玄經垂黜謝之儀有祈昏應輒因吉日虔備  
醮筵披瀝丹誠冀迴真鑒伏乞賜臣解消災滯蠲釋凶  
衰厄會平夷過尤除蕩更增祿算允介福祥誓勤忠孝  
之規上答君親之念永銘素懇祇荷玄慈不任謝過祈  
恩懺災之至謹詞

張宗脩修廬山九天真君還願醮詞

伏以軫翼雄區匡廬真躅位尊五嶽地控九江玉闕金城包括神仙之奧府鑪峰雲蓋含藏真聖之高都宛然疑瑋之中迴秀洪波之上每申瞻禱必介福祥臣頃以謫宦九重漂蓬一葉途經閔境心禱上真冀迴濟祐之慈必備椒漿之獻精誠既啓肝鬢垂徵尋以路阻戈矛浪驚艫艦孤帆有隔假道言歸常恃素誠永酬玄祐今則須宣聖澤屢憇蜀都尋禮道宮迫償宿願輒申醮酌恭達明誠竊聞惟感必通道無不在期迴羽仗豈云

萬里之遙少降馳車不以山川為遠納茲丹懇顯錫鴻  
休前願克圓殊恩遐被乞為臣更蠲罪錄永削災躔成  
匡堯讚禹之功享二首六身之壽得傾忠孝以奉君親  
誓當修勵虔恭依歸道力不任

張崇胤本命南斗北斗詞

伏聞三靈肇位萬象稟形體陰陽之至和韞天地之真  
系於是挺才賦命各有職司主死須生互分關鍵纖微  
具舉考校無遺臣伏念前世今生至於累劫愆違易結

罪咎屢彰秉心未契於神明履行或虧於恭恪因星文  
臨照值年命凶衰遂構災危罔知禳謝今則恭依玉化  
虔對瑤壇選卜良辰肅陳醮禮伏冀南宮六聖別賜生  
名北斗七真明祛死籍三宮削罪五帝除災酬往願於  
名山降休祥於聖澤又臣既頒詔命將赴闕庭江山有  
登陟之憂水陸有舟車之險實資明祐俯契深誠獲達  
帝鄉克賜元吉敢忘修奉上答真靈臣不任

漢州王宗夔尚書安宅醮詞

伏聞太樸肇分三靈設位巢穴之風既替棟宇之制聿興太古聖人隨時立教蓋所以庇寒暑燥濕風雨晦明其後象類滋繁擬議殊廣錯之以乾坤震兌體之以徵羽宮商推彼陰陽運其刑德乙辛庚癸互列職司子午丑寅旁羅主宰六神四殺之界龍虎交馳三黃九紫之鄉禎祥藂萃法覆載而成用揆星日以程功乃考吉凶實聞顯據所以鵠隨太歲鶩避將軍况在最靈敢忘戒懼臣頃以所居室宇淋陋非宜遂卜良辰再申締構取

諸大壯棄彼僭奢慕剪茅築土之風佩山節藻稅之戒  
圻墁云畢土木告周竊慮舂鍾所興或違禁忌功用之  
際或犯神靈乖五姓之宜虧二宅之要或侵傷地脉或  
穿鑿岡原或污瀆吉神或鎮壓凶位因成灾咎曾未懺  
陳是用詳按玄經勵精丹懇虔修大醮恭請真文啓靈  
寶赤書依洞玄符命辟斥凶惡安復龍神謝過延恩祛  
灾請福伏冀三尊降鑒五帝垂光勅八會威靈命三元  
將吏保寧宅宇清肅方隅赦已往之罪尤賜將來之貞




吉允膺祐護永遂乂安其有住宅之中土地之主古今  
遷易五姓雜居因此醮壇兼申奠祝歆茲誠禮各保道  
遙往陟福庭勿為疵癘俾臣舉家蒙澤九族同榮常傾  
忠孝之心以奉君親之德不任

馬師穆尚書土星醮詞

伏以一氣分華三光摘曜照臨羣品司牧萬方尊黃道  
而省常麗玄穹而不紊大則繫乾坤劫歷邦國興亡否  
泰所宗安危攸屬小則人倫善惡年運吉凶祚歷短長

咸歸主宰臣以身宮之內土曜所經本宿之中暗虛所  
歷大小行運皆值衝妨命位之鄉天符所駐灾危重疊  
疾厄嬰纏徒訪三醫未祛久疾恐是積生罪目構此凶  
衰往世愆違成茲滯厄或理務之所致刑賞不明立身  
以來過尤結集神明咎責年命屯蒙夙夜憂兢願申祈  
謝是用考詳纏緯披按科文恭詣靈壇虔修醮禮仰中  
方而瀝懇瞻列象以馳心拜手炷香披誠悔過伏冀玄  
司衆聖垂大有之慈至道高尊降載生之澤蠲除罪犯

解削灾期和釋冤仇消平殃對使百關宣暢六氣均調  
疾苦痊瘳福祥臻會延生南斗落死北宮克承覆祐之  
仁敢負真靈之貺



廣成集卷十二